

# MABULU MATOBWANI



Tobondela. Nkolo, sikawa tondimi. Tondimeli Mwana na Nzambe, pe, na nzela na yango, toyambi Bomoi na Seko na nzela na Ye. Sikawa, tosangani lisusu, na nsima na nzanga oyo, to na mpokwa oyo, mpo na liyangani mosusu, tozali kotalela Yo mpo na Liteya pe mpo na oyo Olingi kolobela biso na mpokwa oyo. Tondimeli Yo, Nkolo, pe totieli Yo motema. Pe Olobaki: “Baoyo batiaka mitema na Yawe, bakozua nguya ya sika, bakopumbwa likolo na mapapu lokola mpongo.” Pe Tosengi, e Nzambe, ete Ópesa biso Nguya yango oyo ekomatisa biso likolo, na mpokwa oyo, wana totieli Yo mitema.

<sup>2</sup> Totondi Yo mpo na bato oyo, pe mpo na motuya na bango na miso na Yo, pe mpo na motuya na bango na miso na ngai. Natondi Yo mpo na yango, Tata. Bazali mayaka na motuya mpo na Yo. Pe nasengi, e Nzambe, na mpokwa oyo, ete Ómimonisa Yo moko epai na bango, kokokana na bosenga na bango. Soki babeli bazali awa, tika ete babikisama. Soki ntembe ezali na makanisi na moto moko; longola yango, Nkolo. Pesa biso bobele Bozali na Yo pe mapamboli na Yo, mpo tozali na bosenga na yango, Nkolo. Yo nde Okoki na nyonso mpo na biso. Pe, soki Yo te, tokoki kosala eloko moko te.

<sup>3</sup> Tosengi ete Óyamba matondi na biso mpo na nyonso oyo Osali. Na Nkombo na Yesu Klisto, tozali kozela na mitema lúkulúku mapamboli na Yo. Amen.

Bokoki kofanda.

<sup>4</sup> Pe, ee, na mpokwa ya lomingo ya lelo, mwa malili ezali—ezali awa na kati, koleka na mpokwa ya lomingo eleki. Tozali kozongisa matondi mingi epai na bandeko na biso oyo basalaki mosala na bosembo mpenza mpo na kotia yango awa. Nayebi bandeko mibale to misato kati na bango. Ndeko Mike Egan, oyo nazali komona na suka kuna, pe ngai. . . Ndeko Mike, ná Ndeko Sothmann, Ndeko (nabanzi) Roy Roberson, ná Ndeko Woods, ná bango nyonso, bayaki awa kosala mosala na mpiko nyonso, mpo na komeka kotia yango mpo tókoka kozua Liteya oyo sikawa, to lelo. Bongo, tozongisi matondi.

<sup>5</sup> Sikawa, na ntongo ya lomingo ekoya, soki Nkolo alingi, nazali na mposa ya kosala liyangani ya lobiko na nzoto, kobondela mpo na babeli. Pe tokobongisa yango mpo na liyangani ya lobiko na nzoto, soki Nkolo alingi.

<sup>6</sup> Namonaki na ntongo ya lelo, ete liboke moko ya misuwále ezalaki awa. Nabondelaki mpo na yango. Pe ngai, ntango bozalaki kobondela pe koyemba, nabondelaki mpo na misuwále; bongo, misusu ezali awa na mpokwa oyo. Bongo, biso—bisu tondimaka ete Nzambe abikisaka babeli. Matatoli minene ya

lobiko na nzoto ezali mingi na kati na biso, pe na mokili mobimba, pe tozali kozongisa matondi mpo na yango.

<sup>7</sup> Pe nakanisaki, lomingo ekoya, lokola nakozala awa te mpo na mwa ntango, pe lokola toumeli mingi likolo na malakisi ya Nsango oyo, bongo, namonaki ete ekozala malamau soki tosali li—liyangani ya lobiko na nzoto, soki tobondeli mpo na babeli. Pe tozali kolikia ete Nzambe akopesa biso bantango malamau.

<sup>8</sup> Sikawa, bato mingi kati na bino basengeli kosala mobembo molai ya motuka na mpokwa oyo. Bongo, nazalaki kosolola na bitonga ya bato kuna na—na Cafétaria Blue Boar, lelo, esika naliaki na moi. Bato mingi ya malamau, nazuaki libaku ya kopesa bango mbote ya loboko pe ya kosolola na bango, bato oyo naino nakutana na bango liboso te, oyo basambelaka awa. Pe nazali kozongisa matondi mpo na baninga ya boye, pe nalingi kotonda moko na moko na bino nyonso. Bamosusu babukaki mbuma ya mûre, pe bamemeli biso. Pe ndeko moko amemeli biso katini ya mai ya sukali, to ya potopoto ya sukali, nabanzi ezalaki yango, pe—pe biloko ndenge na ndenge. Bino boyebi te ndenge ezali kosimba motema na ngai. Pe na ntongo, ntango nalamuki pe nabimi na libanda ya ndako, mikolo mosusu. . .

<sup>9</sup> Mokolo mosusu na ntongo, ndeko mobali moko azalaki wana, ya mobola mpenza, azalaki na bilamba te pe ata na eloko te, alingaki ete nâkende kosombela ye bilamba. Kaka na kobima, nalingaki kobeta libaku na katini moko ya mûre oyo ezalaki wana. Nalobaki: “Yo moto oyei na mbuma ya mûre oyo?”

<sup>10</sup> Pe alobaki: “Te, nazali na likambo na kati te. Nakómaki awa liboso ntongo étana, pe nakutaki yango wana.” Pe Ndeko na ngai ya motema Ruddel moto amemelaki ngai yango. Pe, na bongo, biloko yango, nasepelaka na yango mingi.

<sup>11</sup> Billy Paul auti koyebisa ngai, kala mingi te, ete bakongolaki makabo kati na liyangani ya mpokwa oyo, mpo na ngai. Na—natondi bino mpo na yango. Ngai moto nalingaki te ete bosala yango. Na—nasepeli mpenza na mpiko na bino, pe nyonso wana, kasi bosenga na yango ezalaki te. Pe, kasi, Nkolo apambola bino. Boyebi, boyebi, Biblia elobi: “Mbala nyonso esalaki bino yango epai na moko na baoyo baleki moke, bosalelaki Ngai yango.”

<sup>12</sup> Nde, nalobelaki bino mwa moke, na bosembo mpenza, likolo na Nsango. Pe ngai. . .Bato mosusu bakoki kokanisa ete—ete ngai nakanisi ete Yesu akoya lobi na ntongo to na mpokwa oyo. Ezali bongo. Boye, nalobi te ete Akoya lobi. Pe, lisusu, ekoki kosalema ete Aya te liboso na póso oyo ekoya, ekoki kosalema na mobu oyo ekoya, pe ekoki kosalema na mibu zomi. Nayebi te ntango nini Akoya. Kasi, likambo moko ezali, oyo nalingi ete. . .bobosana yango mokolo moko te, bomilengela na miniti to na ngonga moko na moko. Bomoni? Boye, soki Ayei lelo te, Akoki koya lobi. Bongo, bobosana yango mokolo moko te, ete Azali koya.

<sup>13</sup> Pe nayebi te ntango nini ekozala ngonga na ngai ya suka na mokili oyo, ata moko kati na biso ayebi yango te. Pe moto moko te kati na biso ayebi ntango oyo Ye akoya. Ata Ye moko pe, Ayebaki yango te, kokokana na Maloba na Ye Moko; Alobaki: “Bobebe Tata nde ayebi ntango oyo Akoya, ata Mwana ayebi ntango oyo Akoya te.” Ekosalema nde ntango Nzambe akotindela biso Ye lisusu. Kasi tozali kozela Boyei na Ye. Pe soki Ayei na ekeke na ngai te, Akoki koya na oyo ekolanda; soki Ayei na oyo wana te, Akoya na oyo ya nsima. Kasi, mpo na ngai, ntango etikali mpenza lisusu te. Ngai. . . Mpo na ngai, ekoki kosalema na miniti moko to mosusu. Nzoka nde, elingi koloba te ete. . . Elingi koloba te sikawa, ete bokomona likolo kobogwana, pe nyonso. . . Nazali kolobela Boyei oyo wana te. Nazali kolobela nde Konetolama.

<sup>14</sup> Bomoni, Boyei na Ye ezali misato. Ayaki na Nkombo misato ya Mwana. Ayaki na bósáto; Tata, Mwana, Molimo Mosantu. Bomoni, nyonso wana, kaka Klisto moko, kaka Nzambe moko, na ntango nyonso. Bongo, toyebi ete Ayaki kosala misala misato ya ngolu; kolongisama, kobulisama, libatisi ya Molimo Mosantu. Makambo nyonso, epai na Nzambe, ekokisamaka na motango ya misato.

<sup>15</sup> Bongo, Ayaki, liboso, mpo na kosikola Mwasi na Ye ya libala. Akoya, na mbala ya mibale, mpo na Konetolama, mpo na konetola Mwasi na Ye ya libala. Akoya, na mbala ya misato, elongo na Mwasi na Ye ya libala, Mokonzi ná Mwasi-mokonzi; na nsima, na ntango yango nde bato mingi bazali kozela Boyei.

Kasi ntango Akoya na mbala oyo, bato bakoyeba yango te, bobele baoyo bamilengeli nde bakoyeba ntango Akoya. Bato mosusu bakozala lisusu te. Bato bakoyeba te likambo nini ekómeli bango. Bakonetolama, na mbala moko, pe bakomonana te. “Bakobongwana, na mbala moko, na kobeta ya liso.” Bongo, bomilengela mpenza mpo na yango. Ekozala nsomo na ntongo moko, ete ózanga molingami moko, moto moko te akoki komona bango. Ekozala mawa mingi, koyeba ete esili kosalema pe yo ozangi yango? Na bongo, boumela ntango nyonso liboso na Nzambe.

<sup>16</sup> Sikawa, na póso ekoya, soki Nkolo alingi, mokolo ya mosala moko oyo ekoya, nsima na póso moko, soki Nzambe alingi, nakozongisa libota na Arizona, epai batangaka, na nsima nde na—nakozonga awa.

<sup>17</sup> Nzoka nde, nakendaka kuna te. . . nasalaka mayangani kuna te. Nafandaka mpenza na Arizona te. Nakendaka bipai mosusu. Nakozongisa mwasi na ngai kuna, mokolo ya mosala moko oyo ekoya. Nakozonga lisusu awa. Soki nalongwe awa, nakokende na Colombie-Britannique. Nakozonga na Colorado. Nakozala lisusu na Arizona pene na Noël, kaka mpo na mwa ntango moke, oyo ekoki. . . ntango mosusu mikolo mibale to misato, mpo na

kosangisa libota, kozonga awa mpo na kolekisa lói ya Noël, soki Nkolo alingi, kosala mayangani awa na kati na póso ya bónané.

<sup>18</sup> Bongo, ya solo, nazalaka awa mingi. Nazalaka awa mbala zomi koleka ndenge nazalaka kuna, mpo ete kuna, tozali na losambo te, to tosalaka mayangani te, tozali na eloko moko kuna te, bongo, na oyo etali mayangani na losambo. Yango nde likambo kaka moko ya mabe mpo na yango. Nazali na esika ya kotinda bana te, mpo báyoka Nsango oyo, ndenge bana na bino bayokaka yango awa, na—na bongo, yango nde kokoso kaka moko oyo tozali na yango. Kasi bango nyonso bazalaka mpenza na nzoto kolongonu. Mopepe ekauka, molunge, ekauka mpenza, kasi bana nyonso bamonanaka mpenza nzoto malamumu. Nafandaka kuna mingi te, mpo náyeba soki mopepe yango ezali malamumu na nzoto to mabe. Ngai, natambolaka ntango nyonso, pe na—na—nabanzi ete nabotámá moyengiyengi.

<sup>19</sup> Mwasi na ngai abengaki ngai... nayebi ete azali awa, bongo nakoyoka likambo yango nsima na losambo, bino nyonso boyebi yango. Babengaka yango nini, mipepe oyo etambolaka, to mipepe oyo epemaka te, to nini—nini, boyebi, zelo oyo ezindisaka? To, na elobeli mosusu, natambolaka ntango nyonso. Lelo oyo mbula ntuku mibale na mibale banda nabálá, pe ntango mosusu nakanisaka lokola nazali mopaya na ndako, mpo natindami ntango nyonso kokende.

Kasi nazali kozela ntango oyo tokofanda na Ekólo na biso, mokolo moko. Kasi sikawa, etumba ezali kokoba, na bongo tózala kati na mabondeli.

<sup>20</sup> Bobosana te, lomingo ekoya na ntongo, soki Nkolo alingi, bomema babeli na bino pe bato na mawa. Boya na ntango malamumu, bozua bisika ya kofanda, pe mbala mosusu tokobondela mpona ndambo na bato. Tokosengela kokabola bakalati ya mabondeli. Soki bato bakozala mingi te, tokokabola bakalati ya mabondeli te, soki bakozala bobele ndambo oyo ekoki mpo na kosala mwa molongo moke, ndakisa bato ntuku mibale to ntuku misato, to eloko moko bongo. Kasi mbala mosusu, to—tokokabola bakalati ya mabondeli, na bongo mbala mosusu, tokosala yango penepene ngonga moko liboso ete losambo ébanda, oyo nabanzi ekozala kino... Ekozala na ngonga ya mwambe, mwambe to mwambe na ndambo, bakokabola bakalati ya mabondeli; bakofungola bikuke ya losambo, mpo na kokabola bakalati ya mabondeli, mokolo ya lomingo oyo ekoya na ntongo. Na bongo, boyeba malamumu ete bokozala awa mpo na... Bómema balingami na bino, boleki bango na molongo. Ekozala malamumu na mopepe ya malili na kati ya ndakonzambe, soki bazali na bokono, pe tokosala nyonso oyo tokoki kosala mpo tobondela mpo na bango.

<sup>21</sup> Natondi bino lisusu mpo na libonza ya bolingo.

<sup>22</sup> Pe sikawa, tokotanga Liloba na Nzambe na mpokwa oyo, pe tokomilengela mpo na likambo ya Bozali na Ye lisusu mpo na koteya biso Liloba na Ye. Bongo, toyebi ete tokoki kotanga eteni moko ya likomi, kasi Nzambe moto asengeli komonisa ndimbola na yango. Bomoni? Tokoki kozua likomi, kasi Nzambe moto asengeli komonisa ndimbola na yango. Pe sikawa, wana bozali kozua Buku na Yilimia, mokapo ya 2.

<sup>23</sup> Nalingi koloba ete nazali na esengo ndenge Ndeko Lee Vayle, azali awa elongo na biso, ndeko ya motuya kati na Nkolo. Nakanisi, ndeko oyo, azali awa, nabosani nkombo na ye, Ndeko Willard Crase. Pe namonaki bandeko ya Arkansas, Ndeko John ná bamosusu, oyo bauti na Poplar Bluff, ná Ndeko Blair. Pe, oh, Ndeko Jackson, ná Ndeko Ruddell, pe bazali mpenza mingi na lolenge ete na—nakoki mpenza te. . . Elingaki kozala malamau soki nakokaki kotanga nkombo ya ndeko moko na moko, kasi nakoki te, pe bozali kososola yango. Ndeko Ben Bryant, namoni ye afandi awa; ye nde litúmu na ngai ya ba-amen, ntango na. . . Moto nyonso ayebi Ben na mongongo na ye. Iyo.

<sup>24</sup> Bisu, mokolo moko na Californie, nazalaki koteya Liteya moko epai na ba-Batiste kuna na lobwaku. Bazalaki na hema moko kuna ya monene, pe ezalaki ba-Batiste mingi ya lolenge ya bato ya kilo. Nayokaki ata “amen” moko te na esika moko; boyebi, basi mosusu, bazalaki kobanga ete biloko oyo bapakolaki na bilongi esala banzela-nzela. Bongo, na mbala moko, namoni makolo mibale ya *boye*, emati likolo, ná maboko mibale ya minene, ná suki ya moindo oyo ezalaki koningana, koganga: “Amen,” azalaki koganga ndenge wana. Pe natali na nse, nalobi: “Ben, outi wapi?” Azalaki mpenza koluka “amen” yango.

<sup>25</sup> Nazali komona mwasi na ye azali kotalatala ye, mwa moke. Ee, abandi kobungisa suki na ye ya moindo mwa moke, kasi ekosala eloko te, boyebi. Bómitungisa mpo na yango te. Ngai pe nabungisi oyo ya ngai, eleki ntango molai.

Bongo, sikawa, bobosana kobondela te.

<sup>26</sup> Sikawa, wana tozali kokota na eteni ya sembo mpenza ya liyangani, bobosana te, soki totangi Liloba oyo, na ntango wana Nzambe akopambola Liloba na Ye. “Yango ekozonga epai na Ye mpamba te, kasi Ekokokisa mikano na Yango.” Pe nayebi, soki natangi Liloba, nakozala ntango nyonso na ngámbo ya malamau. Soki natangi Liloba, Nzambe akomemia Liloba na Ye.

<sup>27</sup> Sikawa totelema na limemia mpo na Liloba na Ye. Yilimia, mokapo ya 2, nzela ya 12 pe ya 13 ya Yilimia 2.

*E. . . likolo, okamwa na likambo oyo, ozala na nsomo mingi pe olengalenga, Yawe alobi boye.*

*Zambi bato na ngai basali masumu mibale, batiki ngai, liziba na mai na bomoi, pe bamitimoleli mabulu, mabulu matobwani, oyo ekoki te. . . ekoki kosimba mai te.*

Sikawa togumba motó.

<sup>28</sup> Nzambe Molingami, Liloba na Yo euti kotangama. Tosengi ete Ómemia Liloba yango, pe Opesa biso na mpokwa oyo lise se to oyo ezali kotambola na Yango; wana tozali kotala eleko oyo eleka, Yisalaele, lokola ndakisa, ndenge Biblia ezali kolakisa biso ete tokoki komona ndenge Osalaki na bango ntango batosaki Liloba, komona ndenge Osalaki na bango ntango bazangaki kotosa Liloba, pe koyeba oyo tosengeli kosala. Bongo, tosengi ete Ólobela biso na mpokwa oyo na ndenge mosusu mpenza, mpo tóyeba ndenge ya komikamba na eleko oyo, oyo toyekolaki na ntongo, oyo tozali kobika kati na yango. Mpamba te tosengi yango na Nkombo na Yesu. Amen.

Bokoki kofanda.

<sup>29</sup> Na mpokwa oyo, mpo na—na mwa ntango moke, nalingi kolobela: *Mabulu Matobwani*.

<sup>30</sup> Yisalaele basalaki masumu minene mibale. Nzambe alobi ete bapesaki Ye mokongo, Ye Liziba na Bomoi, pe bamitimolelaki mabulu mpo na komela mai na yango. Sikawa, ezali likambo.

<sup>31</sup> Ntina oyo nakanisaki liteya oyo, ezali mpo ete ekokani na likambo oyo nazalaki kolobela na ntongo, ya ntango oyo tozali kobika, pe ya Ntina oyo tozali kobundela.

<sup>32</sup> Pe totalaka Yisalaele lokola ndakisa, ete, oyo Nzambe azalaki, Asengeli kotikala kaka bongo. Pe eloko ezali kaka moko oyo Nzambe atosaka ntango nyonso, ezali nde nzela na Ye, oyo Abongísá mpo na bato. Pe ntango babimaki libanda na nzela yango, batosaki Nzambe te, pe Nzambe azalaki konyokola bato mpo batangwaki na eloko oyo Alobelaki bango basala, ata soki ezalaki nini.

Apesaki bango ata mobeko: “Kosimba te, komama te, kolia te.” Ezali kaka te mpo kosala yango ezalaki mabe, kasi ezalaki mabe kozanga kotosa oyo Ye alobaki na bango ete básala. Pe na ntango nyonso, mobeko ekoki kozanga etumbu te mpo na mobeko yango. Mpamba te, soki etumbu ezali te, na ntango wana, mobeko ezali na ntina te, soki ezangi etumbu. Mobeko!

<sup>33</sup> Nde, tomoni ete oyo basalaki na eleko oyo kuna ezali lokola oyo tozali kosala lelo, makambo oyo basambeli bazali kosala.

<sup>34</sup> Sikawa tomoni likambo ya ndenge mosusu awa. Bato mosusu bakoki komona yango ndenge, ntango Alobaki: “Bino, bango, bamitimoleli mabulu, mabulu oyo etobwani.” Bongo, ntango mosusu bato mosusu kati na bino bayebi te eloko nini libulu. Bato boni bayebi eloko nini libulu? Ee, mingi kati na bino. Soki okólá na elanga, oyebi eloko nini libulu. Nabosani te, namélá banyama ya mike-mike mingi oyo ezalaki kouta na kati, mpo na—mpo na koyeba eloko nini li—libulu.

Natéyá na bamboka ya mosika, na bazamba, epai okokuta mbeki ya monene oyo etóndá na mai ya libulu, oyo—oyo euti na

mbula, boyebi, pe esili koumela. Pe—pe na nsima, banyama ya mike-mike, na butu, bazalaki kokota na kati. Na bongo, nayebi malamumu eloko nini mai ya libulu.

<sup>35</sup> Li—libulu ezali e—esika, eloko oyo batimoli na mabele, mpo na kozua esika ya liziba. Na esika oyo bato bazangi liziba, nde bakosala li—libulu. Na elobeli mosusu, libulu ezali ebombelo oyo bato basali, to liziba oyo bato basali kati na mabele, oyo bato batimoli, mpo na koyamba mai, ya—ya kosalela. Bato mosusu basalelaka mai yango mpo na kosukola, pe bato mosusu basalelaka mai yango mpo na komela, pe ntango mosusu, mpo na misala ndenge na ndenge. Na kala, mai nyonso oyo tozaláká na yango, ezaláká kouta na libulu. Tozaláká na eloko moko boye, oyo esengelaki kobalola, kobalola, kobalola, kobalola, mpo na komatisa mai; ezalaki na mwa bakatini, mpo na kotoka mai na libulu.

<sup>36</sup> Ee, tótala eloko moko na ntina na libulu, oyo ekesani na liziba. Bongo, libulu ekaukaka. Li—li—libulu ekoki kotonda yango moko te. Ezali—ezali. . . Ezali eloko ya kotiela motema te. Okoki kotiela libulu motema te. Esengeli kotia motema pe kotalela ba-mbula oyo ebetaka na ntango ya molunge to na ntango ya malili, to na ntango mosusu mpo na. . . Na momesano, na ntango ya malili, ntango matandala pe mbula enokaka, nde ememaka mai na kati ya libulu. Pe soki ezui mai wana te, boye o—okozala pe na mai te. Na mobimba—na mobimba. . . ekaukaka. Ekoki kotonda lisusu yango moko te. Libulu ya kala ekoki kotonda yango moko te. Etondaka nde na ba—bambula oyo ebetaka.

<sup>37</sup> Pe nalingi kotalisa bino eloko mosusu na ntina na libulu. Na momesano, bokomona, to ndenge ezalaki epai na biso, libulu. . . Na momesano, ndako ya bibwele ezalaka monene penepene mbala mibale koleka ndako ya kolala, pe na momesano, bamemaka mai longwa na ndako ya bibwele, kino na libulu. Nakanisi lisusu, libulu ya kala oyo kuna, ntango azalaki na. . . ntango ba—batiyó pe ezalaki komema nyonso wana, longwa na ndako ya bibwele. Etondaka nde na mai oyo eutaka na ndako ya bibwele.

Bongo, mai yango ewutaka likolo na ndako ya bibwele; epai wapi, banyama nyonso banyataka, na lopango mobimba, pe bosoto nyonso ya lopango ya bibwele efandaka likolo na ndako ya bibwele, na ntango ya elanga. Na nsima, mai ekoya kokitisa yango nyonso longwa na motóndo, kolekisa yango na nzela ya mai oyo bato basali, na nsima eleki na tiyó oyo bato basali, kino na libulu oyo bato basali. Pe soki ozali na mbindo te, nayebi te eloko nini ozali na yango, ntango ozali na libulu. Iyo, misie! Nyonso wana, esalemi na bato, pe ezali suka na bosoto.

<sup>38</sup> Boyebi, tozaláká kobenga. . . Tozaláká kotia kitendi lokola ekongoleli likolo ya libulu. Boyebi oyo yango ezalaki? Esengelaki

kotia kitendi moko lokola ekongoleli likolo na yango, mpo na kokanga banyama mike-mike pe nyonso oyo ezalaki kouta likolo na nda—ndako ya bibwele, pe na nzinga-nzinga, oyo ezalaki koleka na bisika ndenge na ndenge, kino na libulu. Pe tozáláká kotia ki—kitendi lokola ekongoleli likolo na yango, mpo na kokanga bo—bosoto, pe biloko nyonso oyo tokokaki kokanga. Na ntembe te, ezalaki kokanga bosoto ya solosolo te, ezalaki kolongola bobele biloko ya minene oyo ezalaki kokita pe kokwea kuna na kati. Nyama moke ekokaki kowea na kati, kasi mai ya nzoto ya nyama yango ezalaki koleka elongo na mai. Bongo, o—ozali mpenza na mbindo soki ozalaki na libulu ya kala ya bosoto.

<sup>39</sup> Nsima na mwa mikolo, soki otiki mai yango wana, ekokóma na bosoto. Soki otiki mai na libulu, ekokóma na bosoto. Pe ekotonda na—na magbololo, miseleketete, pe banyoka. Pe tozáláká kobenga yango “mataká,” mwa . . . nayebi te soki . . . Bazali baparázíte te, bazali . . . Nabosani, nayebi te ndenge bobengaka yango. Kasi ezali mwa biloko ya mikemike, oyo ezalaka na kati ya mai, oyo—oyo tozalaki kobenga mataká. Boyebi yango. Bato boni bayebi eloko nazali kolobela? Oh, nde, na ntembe te, bino nyonso bato ya mboka boyebi yango. Okomona yango etondi na bosoto, pe banyama oyo balingaka bosoto balandaka yango. Na bosembo, balandaka nde bosoto. Pe lokola ezali na bosoto, ebendaka nyama oyo elingaka biloko ya bosoto.

<sup>40</sup> Yango ekokani mpenza na mangomba na biso ya lelo. Nakanisi ete totiki . . . Moko na masumu minene oyo lingomba basali lelo, kaka lokola Yisalaele na ntango wana, batiki Ye, Liziba ya Mai na bomoi, pe bamitimoleli mabulu oyo esalemi na bato. Pe ekómi efandelo ya biloko nyonso oyo elingaka mai ya lolenge wana. Miseleketete, magbololo, pe mikolóbe ya mbindo ya lolenge nyonso, ezali kofanda wana, mpo ezali ebombelo oyo bato basali. Pe biloko yango efandaka na ebombelo wana, ndakisa mpenza ya bibongiseli na biso ya lelo.

<sup>41</sup> “Sikawa,” bokoloba, “Ndeko Branham, mpo na nini obundisaka bato yango makasi boye?”

Esengeli kolobela yango makasi. Esengeli kolobela yango makasi. Bokima yango, mpo ekosuka na kosala elembo na nyama. Bobosana te, ezali Solo! Ekozala elembo na nyama. Ebongiseli ekokamba mbala moko na yango. Ezali na nzela mpo na kokóma kuna sikawa, etindami na makasi, na nguyana moko.

<sup>42</sup> Botala bokonzi ya Roma na kala. Yango mpenza nde ekambaki bango na elembo wana ya lipengwa. Bomonaki ete moto moko te akokaki kosomba to koteka soki azangi elembo na nyama. Asengelaki kozala na yango.

<sup>43</sup> Lolenge ya bato oyo bakozala na mokili ezali bobele mibale; baoyo bakozala na Elembo na Nzambe, pe baoyo bakozala na elembo na nyama. Bobele lolenge mibale wana, bongo



okosengela kozala na moko to na mosusu. Ekozala lipengwa, e—elembo ya—ya kosambela, kosambela ya bopengwi.

44 Pe ekosala ekeko na nyama. Wana toyekoli yango, tomoni ete Roma ezalaki, ezali, pe ekozala ntango nyonso, elemb- . . . to, nyama. Ya solo. Nzela ya kososola yango ndenge mosusu ezali te. Roma!

45 Pe Roma esalaki nini? Elongwaki Roma ya bopagano pe ekómaki Roma ya bopápa, pe esalaki ebongiseli, ebongiseli ya mokili mobimba, oyo ezalaki kokotisa bato na makasi na losambo wana, soki te babomi yo.

46 Pe ezali likambo ya kokamwa komona ete Etats-Unis oyo, ezali kokota na mosala, pe ezali lokola mwana na mpate. Pe mwana na mpate azalaka na mwa maséké mibale, makoki ya léta pe ya lingomba. Pe nsima na mwa ntango, na ntango oyo azalaki mwana na mpate, tomoni na nsima ete azalaki koloba lokola dalagona, pe azalaki kosalela nguya nyonso oyo dalagona azalaki na yango liboso na ye. Pe Biblia elobi na biso ete bazalaki koloba: “Tósala ekeko na nyama.” Ekeko ezali eloko oyo ekokani na eloko mosusu. Pe tozali komona yango sikawa ete, na motindo na yango ya bopengwi, lingomba ezali kosala Lisanga na Mangomba ya Mokili, oyo ezali ekeko ya nguya ya Roma; pe ekotinda bato na makasi ndenge Roma ya bopagano esalaki . . . to, ndenge Roma ya bopápa esalaki. Bongo, nzela mosusu ezali te, eloko mosusu te. Kasi ezali Solo.

47 Pe yango wana nazali kobundisa yango na eleko na ngai, na ntango na ngai, mpamba te esengeli kobundisama. Babelelaki, ete: “Bino bato na Ngai, bobima kati na ye, ete bosangana na masumu na ye te!”

48 Sikawa, nazali kokokanisa yango na mabulu oyo ya bosoto, ya mbindo. “Azali Liziba na Bomoï. Azali Mai na bomoi.” Kasi bato batiki Yango, pe bamitimoleli mabulu oyo ekoki koyamba bobele bosoto. Eloko moko kaka oyo ekoki koyamba, yango wana. Pe yango nde bibongiseli bazali kosala; bazali koyamba nyonso oyo ezali koya pe oyo elingi kokota. Babelemi mpo na koyamba yango, soki ezali na mbongo to soki balataka na lolenge moko boye. Ata soki bazali banani, bauti wapi, bakoyamba bango kaka.

49 Sikawa tomoni yango lisusu, elembo na nyama oyo esalemaki awa. Amerika, motango na yango ezali zomi na misato. Ebandaki na ba-koloní zomi na misato. Ezalaki na bendele oyo ezalaki na minzoto zomi na misato, banzela zomi na misato. Pe ezali ata kobima na Emoniseli mokapo ya 13. Pe na Amerika, mbongo na biso ya bibende ezalaka ntango nyonso na elongi ya mwasi. Ata motó ya Indien, oyo ezali likolo na cent moko, ezali elongi ya mwasi. Toyebi yango, toyebi lisolo yango. Biloko nyonso, Ngonga ya Bonsomi, pe nyonso mosusu, bonsomi . . . Ekeko ya Bonsomi,

pe nyonso, ezali mwasi. Mwasi; motango zomi na misato. Bomoni? Bongo, ezali—ezali kitoko komona biloko yango.

<sup>50</sup> Pe sikawa, nalobaki liboso, na nzela na emoniseli kouta na Nzambe, to na emononeli na mobu 1933, ete makambo nsambo ekosalema liboso na suka na ntango. Na bongo, moko na yango, ezalaki ete “Mussolini,” oyo abandaki kokóma mokonzi ya nko, ete “akokóma mokonzi ya nko. Pe, akokota na Ethiopie pe akokende kuna, pe akobotola Ethiopie. Pe Molimo yango, Alobaki: ‘Akokwea na makolo na ye.’”

<sup>51</sup> Nazali komituna soki ndeko moko ya kala akoki kozala awa na losambo, oyo abosani te ete nalobaki yango, kuna na Hall Redman, ntango nazalaki koteya, eleki bambula ebele, ebele, ebele. Ndeko moko akoki kozala awa, na mpokwa oyo, oyo atikalá kati na bandeko oyo bazaláká na Hall Redman, ntango nateyaki, ntango N.R.A. ezalaki naino, kala mpenza, ntango Roosevelt azalaki na bokonzi mpo na mbala ya liboso? Nabanzi ata ndeko moko azali awa te. Moto moko azali? Iyo, iyo, moko, moko azali. Iyo, Madame Wilson, nabosani ye te. Mwasi na ngai, afandi kuna na suka. Bandeko mibale batikali, kati na bato ya kala oyo bazalaki na eleko wana.

Ntango bazalaki koloba ete N.R.A. nde ezali elembo na nyama, nalobaki: “Yango ezali na likambo te; ata moke te. Elembo na nyama ekouta awa te. Ekouta na Roma. Pe yango ekoki kozala elembo na nyama te.”

<sup>52</sup> Pe sikawa, bómikanisela ete makambo yango elobamaki. Nalobaki: “Adolf Hitler, suka na ye ekozala likambo ya kokamwa. Pe akosenga etumba na Etats-Unis. Bakotonga eloko—e—eloko moko ya monene ya betó, na lolenge ete bato bakofanda ata kati na yango. Pe na esika yango nde basoda ya Amerika bakobetama na ndenge ya nsomo, kuna.” Pe ezalaki nde ligne Siegfried, mbula zomi na moko liboso kutu bábanda kotonga yango. Na nsima nalobaki: “Kasi akosuka; pe Etats-Unis bakolonga etumba.”

<sup>53</sup> Na nsima nalobaki ete: “Ba-izme ezali misato; Nazizme, fascizme, na kominizme.” Pe nalobaki: “Nyonso wana ekosuka na kominizme. Russie ekomela nyonso wana, na kati ya kominizme.”

<sup>54</sup> Pe nalobaki: “Zebi ekokola mingi mpenza, bato bakokóma na mayele mingi, bakosala biloko mingi, kino bakosala motuka moko oyo ekozala lokola líki, oyo ekozala na eloko moko lokola talatala likolo na yango, pe bakotambwisa yango na nguya mosusu, kasi na yenda te.” Pe basili kosala motuka yango.

<sup>55</sup> Pe nalobaki: “Na nsima, bomoto ya basi na biso ekokwea mingi pe bakosala makambo ya nsoni mpenza, na lolenge ete bakozala lisusu na motuya te mpo na bikólo nyonso. Bakolata bilamba ya mibali. Bakokoba kolongola bilamba na bango, kino

ete bakotikala bobele na bilamba na bango ya nse, esili. Pe, suka-suka, bakokóma kolata bobele lokasa ya mosuke.”

Pe soki botali, na zulunale *Life* ya sanza eleki, batiaki mwasi moko oyo alataki nkasa ya mosuke. Pe yango nde elamba ya feti ya mikolo oyo, to robe, oyo bakómi kolata na mpokwa; ezali komonisa nzoto, okoki komona na kati, nkasa ya mosuke ezali kobomba bobele eteni moko ya nzoto na ye; ná ba-maillot de bain, oyo ezangi ba-bretelle, na likolo na yango, ezali kotika nzoto polele. Pe makambo yango esalemi mpenza!

<sup>56</sup> Na nsima nalobaki: “Namoni mwasi moko ateleme na Etats-Unis, lokola mwasi-mokonzi monene to eloko moko ndenge wana. Pe azalaki kitoko na kotala ye, kasi azalaki na motema mabe. Pe asalaki ete ekólo étambola, élanda matambe na ye.”

<sup>57</sup> Na nsima nalobaki: “Na suka, Ayebisaki ngai nátala lisusu na Ésti. Pe, ntango natalaki, namoni, ezalaki nde, lokola mokili epasuki. Pe nyonso oyo nakokaki komona, ezalaki bobele biteni ya nzete, pe—pe mabanga oyo ebwakamaki likolo uta na kopasuka wana, ezalaki kobimisa milinga.”

Pe makambo oyo esengelaki kosalema liboso na suka ya mokili. Pe makambo mitano likolo na nsambo esili kokokisama, kati na mibu ntuku misato na misato. Tokómi nde wana, tozongi na ntango ya suka!

<sup>58</sup> Pe kaka na eleko yango, nazalaki kopamela mimesano ya bibongiseli. Pe nazali kokoba kondima, na mpokwa oyo, ete ezali libulu ya zongo, ete ezali esika oyo bosoto ekendaka. Nakoki kondima te ete Nzambe akoki kokotisa eloko ya bongo kati na Lingomba na Ye, mpo ete esengeli kobotama na Molimo na Nzambe, pe kopetolama liboso ete ekoka kotangama ya Ye. Nzoto na Klisto oyo emonanaka te, tobatisamaka kati na Yango na nzela na libatizi ya Molimo Mosantu.

<sup>59</sup> Iyo, mimesano ya mabulu oyo ezali mpenza ndakisa oyo ebongi ya bibongiseli. Moto na bwania asengelaki kofungola miso, pe mpo ákota kuna soki moke te, mpamba te Nzambe atalisi polele kati na bileko ete Azali kotelemela yango pe Asálá naino na yango te. Etonga nyonso. . . Ntango nyonso moto moko azalaki koya na nsango, ndakisa Luther, Wesley, pe bongo na bongo, Smith, Calvin, ná bamosusu; kaka ntango bazalaki kobanda ebongiseli, Nzambe azalaki kotia yango pembeni pe Azalaki lisusu kokende kotala yango kati na kolamuka te.

<sup>60</sup> Boluka kati na masolo ya kala. Na ntango moko te, Nzambe akamáta ebongiseli, mpo na kobimisa kolamuka uta na yango, na esika moko te. Boye, na masolo ya kala pe na nzela na Biblia, etalisami polele ete ezali eloko ya mbindo na miso na Nzambe, na bongo nazali na ntina na yango te. Pe yango wana natelemelaka yango. Namekaka kobimisa bato libanda na yango.

<sup>61</sup> Ndenge esalemaki na Yisalaele, ezali pe bongo sikawa, tobiangami kotala Yisalaele mpo na kozua ndakisa. Bango,

na ntango nyonso oyo bazalaki kokangama na Liziba yango, bazalaki malamau. Kasi ntango babandaki komitimolela mabulu, mimesano oyo bato basali, Nzambe atikaki bango wana. Akosala pe bongo mpo na biso. “Basundoli Ye, Liziba na Mai na bomoi.” Yango nde likambo oyo Nzambe apamelaki bango. “Komisalela eloko moko oyo bakokaki koloba: ‘Bomoni eloko tosali!’”

<sup>62</sup> Sikawa, na ntango ya mo—mobembo na Mose; ntango Nzambe, na ngolu, Apesaki bango mosakoli, Apesaki bango Likonzi na Mótó mpo étambola liboso na bango, Atatolaki Yango na bilembo pe bikamwa. Ngolu nde epesaki biloko nyonso oyo. Yisalaele bazalaki kaka na mposa, bazalaki kaka komona mobeko. Baboyaki ngolu, mpo na kozua mobeko.

Ezali mpenza oyo bato bazali kosala lelo. Bazali koboya Liloba, mpo na kozua mimesano ya ebongiseli, mpo ete na kati kuna bakoki kosala oyo balingi pe kozanga etumbu. Kasi okoki kosala yango kati na Klisto te! Osengeli kotika yango mbala moko mpo na libela, mpo na kozala kati na Klisto.

<sup>63</sup> Kotika liziba, mpo na mimesano to libulu oyo bato basali, okoki kokanisa ete moto ásala bongo? Okoki kokanisa lolenge ya bongó ya moto oyo akokaki komela mai ya sika ya liziba, bongo átika yango mpo na libulu oyo bato basali, ná magbololo, miseleketete, mataká, pe nyonso mosusu na kati?

Na mayele ya bomoto, ezali komonana ete ezali ata malamau te, kasi ezali mpenza likambo oyo bato basali. Batiki Liloba, Liziba ya solo ya Nzambe pe ya Nguya na Ye, mpo na komela mai ya mabulu, pe komisalela mabulu. Kaka ndenge basalaki kala, basali pe bongo lelo. Balobaka . . .

Alobaki: “Batiki Ngai.” Awa Alobaki, awa na Yilimia 2:14, to 13 nde. Alobaki: “Batiki Ngai, Liziba ya Mai na bomoi.”

<sup>64</sup> Sikawa, tomoni eloko nini libulu. Tomoni biloko oyo yango eyambaka. Tomoni ndenge esalemaka. Ezali eloko oyo bato basali, oyo eutaka likolo na motóndo ya bosoto. Mbula oyo enokaka, ebetaka likolo na motóndo ya bosoto, pe ezali mpenza komema nyonso oyo ezali likolo na motóndo, elekisaka yango na nzela ya mai oyo bato basali, na tiyó oyo bato basali, kino na ebombelo oyo bato basali. Pe bosoto nyonso esanganaka kuna, pe mi—mikolóbe, miseleketete, magbololo, pe baniamama mike oyo ezali na nzinganzinga, balingaka yango. Pe, botala, ezali banyama ya mbindo; mataká, ya mai ya bosoto. Litaká akoki kobika na mai ya peto te. Soki afandi wana, ekoboma ye. Esengeli ete azala kati na mai ya bosoto.

<sup>65</sup> Ezali pe bongo mpo na ba-parazíte mingi ya lelo. Okoki kobika kati na mai ya sika ya Molimo Mosantu te. Yango wana batelemelaka Liloba makasi boye, pe balobaka: “Ezali komitemela Yango moko. Ezali na ntina moko te.” Ezali mpo basengeli kozala na mwa mai ya bosoto mpo baningana kati na yango. Ya solo.

Ezali pe bongo mpo na magbololo, mpo na miselekete, pe mpo na mataká, baniama ya motindo wana. Mpo na kozala na bomoi, esengeli bázala kati na mai oyo etambolaka te to mai ya bosoto, mpamba te lolenge na bango ezali ete babika wana. Pe okoki kobongola nyama te soki obongoli lolenge na ye te.

Pe okoki kosala te ete moto ámona Liloba na Nzambe, soki lolenge na ye ebongwani te; pe ntango lolenge na ye ebongwani, atiki lolenge na ye pe akómi mwana na Nzambe, pe Molimo Mosantu akoti kati na ye. Molimo Mosantu nde akomaki Liloba na Nzambe!

<sup>66</sup> Lelo nazalaki kosolola na moninga na ngai ya motema, Docteur Lee Vayle, oyo azali awa sikawa. Azali mpenza moto na likindo, na bongo, na momesano, to—tosololaka mwa mingi likolo na Makomi. Azali mayele mingi.

Mokolo moko atunaki ngai likanisi na ngai mpo na oyo etali ndangá ya liboso ya Molimo Mosantu: “Boye ezali minoko na sika?” Likambo yango, eleki mibu ebele.

Nalobaki: “Te, nazali komona yango te.”

Alobaki: “Ata ngai pe,” alobaki, “nzoka nde, batéyá ngai bongo.” Alobaki: “Bongo mpo na yo, ndangá yango ekoki kozala nini?”

<sup>67</sup> Nalobaki: “Ndangá oyo ebongi be koleka, mpo na ngai, ezali nde bolingo.” Bongo, tobandaki kosolola likolo na yango.

Na nsima, namonaki ekokaki kozala solo, bongo, kangamaki na yango: “Soki moto azali na bolingo.”

Kasi mokolo moko Nkolo, na nzela na emononeli, asembolaki ngai. Pe Alobaki ete: “Ndangá ya Molimo ezali nde baoyo bakoki koyamba Liloba,” bolingo te, minoko na sika pe te, kasi ezali nde koyamba Liloba.

<sup>68</sup> Bongo, Docteur Vayle alobaki na ngai ete, “Ezali kati na Makomi,” alobaki, “mpamba te, na Yoane 14, Yesu alobaki: ‘Ntango Molimo Mosantu akoya likolo na bino, Akomonisa bino makambo oyo Nalakisaki bino, pe Akoyebisa bino makambo oyo ekoya.’”

Boye, yango nde ndangá ya solosolo ya Molimo Mosantu! Naino Ayebísá ngai likambo ya lokuta te. Bongo, “Ezali ndangá ya Molimo Mosantu, ezali nde moto oyo akoki kondima Liloba.” Okoki kozua Yango.

Mpamba te, Yesu alobaki te: “Ntango Molimo Mosantu akoya, bokoloba minoko na sika.” Alobaki te ete, ntango Molimo Mosantu akoya, bokosala moko na makambo wana. Kasi Alobaki: “Akozua makambo oyo epai na Ngai pe Akoyebisa bino yango, pe Akoyebisa bino makambo oyo ekoya.” Na bongo, yango nde ndangá ya solosolo ya Molimo Mosantu, kokokana na maloba na Yesu Ye moko.

<sup>69</sup> Boye, kotúntuka nyonso oyo ná makambo oyo bato bazali na yango pe bazali kokoba kobika na yango, bokoki komona mpo na nini bazali kosala yango. Bomoni, ekómi ebongiseli, to mai ya bosoto, pe ebongiseli moko te ekosalema likolo na kom- . . . na Liloba na Nzambe oyo ebongi be. Ekoki kosalema te, mpo okoki te kokómisa Nzambe lingomba to ebongiseli. Te, misie!

<sup>70</sup> Ntina na yango ezali ete, soki ozui bato oyo bakoki kondima Liloba, tika bango bábanda ebongiseli. Mbala moko, kati na mbula moko, ekotonda na ba-Ricky oyo okoki kosala na bango eloko moko te. Bango nde bakosimba makambo na maboko na bango, pe okoki kosala eloko te. Nzambe asalaka bongo te. Te, na bongo toyebi ete likambo yango ezali libanda. Ekómi libulu, pe ekómi esika oyo moto na moto akosala boyokani na likambo *oyo, oyo kuna*, to *oyo mosusu*, mpo na kokotisa bato, to kosala ete bato bákota.

<sup>71</sup> Tomoni ete momesano yango ebandaki na eleko moko boye, kala, na ntango ya bana na Yisalaele, ntango bazalaki kotimola mabulu wana. Mobali moko ná etonga ya Bafalisai basiláká kotimola mabulu. Bazalaki na mobali moko na nkombo Elode, oyo azalaki mokonzi, moyangeli ya etuka.

Pe ayaki koyoka mobali moko, oyo azalaki kobebisa ntango na ye na bibongiseli na bango te. Azalaki mosakoli. Pe ata mosakoli moko te asila kozala na ntina na ebongiseli, kasi bazalaki koyina yango. Mosakoli yango abandaki koloba: “Bobanda koloba kati na bino moko te ete, ‘Tozali na tata na biso Abalayama,’ mpo Nalobi na bino ete Nzambe akoki kobimisela Abalayama bana na mabanga oyo.”

<sup>72</sup> Batindaki moto na lokumu mpo áyá koyoka ye. Moto na lokumu yango abotolaki mwasi ya ndeko na ye, pe abalaki ye. Pe eloko nini mobali wana ayaki koloba liboso na ye? Bakanisaki ete akosala boyokani, pe akoloba: “Sikawa, misie, yo, fanda na kiti ya kitoko *awa*. Pe osengelaki . . . Nazali na esengo mingi ndenge oyei koyoka ngai awa lelo.”

Yoane akendeke liboso na ye mpenza, pe alobaki: “Ezali malamú te mpo na yo ete obala ye.” Likambo ya liboso mpenza oyo alobaki, apamelaki ye mpo na lisumu na ye.

<sup>73</sup> Bomoni, bibongiseli ezali kobota mai ya bosoto, epai wapi mobali akoki kobika na basi, pe basi yango bakoki kosala oyo balingi, kokata suki, kolata bakupe, pe nyonso mosusu, pe komibenga Baklisto.

Kasi Liziba oyo ya solosolo, aleluya, ya Nguya na Nzambe, ekoki kofanda wana te, mpo Ekobwaka yango libanda. “Nazali Liziba ya Mai na bomoi. Batiki Ngai, mpo na komitimolela mabulu.”

<sup>74</sup> Nzoka nde, liziba ya mai na bomoi, tomoni, liziba ya mai na bomoi ezali nini? Tomoni eloko nini libulu, sikawa liziba ya mai na bomoi ezali nini? Ezali libulu ya solosolo.

“Libulu ya solosolo, ezali nini, Ndeko Branham?”

Ezali libulu oyo motó na yango eutaka na nse na mabele, pe ebwakaka mai na yango libanda. Etiolaka ntango nyonso. Emikoki na yango moko. Ezalaka ntango nyonso sika pe peto, libulu oyo ya solosolo, liziba ya mai na bomoi. Ekufaka te pe ezalaka ya bosoto te. Ezali na bomoi, ebongwanaka ntango nyonso, ebimisaka ntango nyonso eloko ya sika, ekobaka komata, uta na motó na yango. Makasi na yango eutaka na—na nse, oyo ezali. . . yango pe ezali liziba ya mai na bomoi oyo ezali kobima. Emipetolaka yango moko; ezali mai ya peto, ya kitoko, ya peto. Emikoki na yango moko; ozali na ntina ya kozela mbula mpo etondisa ebombelo na yango te. Etokaka ntango nyonso, epesaka mai na yango ofelé. Ozali na ntina te ya kopompé yango, komatisa yango, kobalola yango, to kokota na yango. Ezali kaka liziba ya mai na bomoi.

<sup>75</sup> Boyebi, kamata mwa mabulu wana, osengeli kobalola, kobalola, kobalola manivelle, kopompé pe nyonso, mpo ózua mwa mai wana ya bosoto. Hum!

Kasi Liziba ya Mai na bomoi epesaka Yango, ofelé, kozanga kopompé, kokota, to eloko mosusu. Oh, nazali na esengo mpo na Liziba yango! Iyo, misie.

<sup>76</sup> Ezali na bosenga ya ekongoleli likolo na Yango te, mpo na kolongola mikolóbe. Mpamba te, Ezali kouta na nse mpenza, na kati ya Libanga, na lolenge ete ba-parazíte ezali kuna te.

Ezali na ntina ya kozala na kitendi ya kelasi likolo na Yango te, ya solo, mwa mimesano ya mokili, ya buania ya bibongiseli oyo esalemi na bato; mpo na koyebisa yo, liboso na pisikiátre, soki ezali na makoki ya koteya to te. Ezali na kitendi moko ya bosoto likolo na Yango te. Ekobwaka yango pembeni kaka ntango okotia yango likolo na yango. Okoki kosala yango te. Liziba wana, etokaka ntango nyonso. Soki otii kitendi moko likolo na yango, ekobwaka yango mbala moko na ngámbo moko to mosusu. Ezali na ntango ya kotika kitendi ya ebongiseli likolo na yango te.

<sup>77</sup> Ezali na bosenga ya ekongoleli te, kiyungulu te, kopompé yango te, koningisa yango te, eloko mosusu te. Ezali kaka wana, ezali kotoka. Ezali na ntina ya kotalela bambula na biso awa mpo na kotondisa yango te. *Mbula* elingi koloba “kolamuka,” epai wapi Liziba yango. . . Oyo ezali na Liziba yango ya Bomoi. “Esika ebembe ezali, kuna bampongo bakoyangana.” Ozali na ntina ya kopompé te, mpo na kozua kolamuka; ozali na ntina ya kopompé eloko moko te. Eloko moko kaka oyo osengeli kosala, ezali bobele ete óyá na Liziba. Ezalaka ntango nyonso ya kotonda na mai kitoko ya sika, pe Ezalaka na suka te. Etokaka kaka ntango nyonso.

<sup>78</sup> Ozali na ntina ya kokende na libulu te, koloba: “Ee, soki mbula ebeti pe ememi mbindo nyonso ya ndako ya bibwele,

tokozua mai ya komela.” Bomoni? Hólalá, hólalá! Boye te. Liziba oyo ya solosolo ebimisaka mai ya kitoko, ya malili ntango nyonso. Okoki kotiela yango motema. Ozali na ntina te ya koloba: “Ee, nakokende kuna, na libulu wana. Tozaláká komela mai na yango, kasi eleki ntango molai, mbula ebeti te. Tala, ekoki kozala ete ekauka.”

<sup>79</sup> Mimesano mosusu oyo bato basali ezalaka nde bongo. Okoki kokota kuna, soki ozali na mombongo moko ya monene, oyo ezali kotambola, mayele mabe ya koteka biloko, to—to likambo moko boye, ba-feti ya minene pe makambo oyo esalemaka kuna, masano ya loto, ba-feti na ndako ya nse na mabele, pe nyonso wana, okoki kokuta bato batondi meke.

Kasi soki okei esika Liziba ezali kotoka, ntango nyonso, bato bazali kuna, bazali komela mai ya kitoko ya malili. Okoki kotiela Yango motema! Okoloba: “Eleki mbula zomi bazali na kolamuka te.” Soki ofandi pembeni na Liziba yango, Ezalaka na kolamuka ntango nyonso.

<sup>80</sup> Ndenge elenge mobali ya Mboka Galles alobaki. To, mokolo moko, ntango kolamuka ya mboka Galles ezalaki naino, bato ya lokumu bayaki oyo bautaki na Etats-Unis. Ndambo na balakisi minene ya likindo bakendeki na mboka Galles, mpo na komona esika pe ndenge makambo yango ezalaki kosalema. Bongo, nkingo ya bilamba na bango ebalukaki na nsima, ná bikoti na bango ya milai lokola kikalungu, bazalaki kotambola na nzela.

Pe elenge polísi moko akómaki wana, azalaki kobalola mwa lingenda na ye na loboko, pe kobeta piólóló: “Na ekulusu esika Mobikisi na ngai akufaki, kuna, mpo na bolimbisi na masumu nalelaki; kuna Makila etiamaki na motema na ngai, nkembo na Nkombo na Ye,” wana azalaki kotambola na nzela.

Bongo, balobaki: “Mobali oyo azali lokola mosambeli. Tokende kotuna ye.”

Balobaki na ye: “Misie!”

Alobaki: “Iyo, misie?”

Alobaki: “Touti na Etats-Unis. Batindi biso. Toyei awa mpo na koluka koyeba likambo oyo bazali kobenga kolamuka ya mboka Galles. Biso tozali balakisi ya Likindo, toyei awa mpo na kotala yango malamú.” Alobaki: “Tolingi koyeba esika kolamuka yango ezali, pe esika ezali kosalema.”

Alobaki: “Misie, bokómi. Ngai nde kolamuka ya mboka Galles.” Amen! “Kolamuka ya mboka Galles ezali kati na ngai. Ezali kosalema nde awa.”

<sup>81</sup> Ezalaka bongo ntango moto azali kobika pembeni na Liziba ya Mai na bomoi. Ezali na bomoi ntango nyonso, Ezali kotoka, kotoka, kotoka pe kotoka. Ezali na suka te. Ezali te: “Kende kotala soki mai ezali, soki mbula ebeti mikolo oyo,” ezali bongo



te. Ezali nde Liziba wana ya Mai na bomoi. Ndenge nalobaka, Epesaka Mai na Yango ofelé.

<sup>82</sup> Ozali na ntina ya kotia kitendi likolo na Yango te; mpo na koyeba; kitendi ya kelasi, liboso ete bakoka kotinda ye ákende koteya, pe koyeba soki akomaka malamú, soki alobaka malamú, soki asalelaka bankómbó pe makitana, pe nyonso wana, ná mabakema. Mingi kati na bango bayebi ata oyo yango ezali te, kasi ata bongo azali kaka kobika pembeni na Liziba, bomoni, ata bongo.

<sup>83</sup> Yango etalelaka bambula na biso awa te, mpo na kotondisa yango, to kolamuka na biso awa te, mpo na yango. Ezali na ntina ya kosala bongo te, mpamba te Nguya na yango pe bopeto na yango ezali kati na yango moko. Kuna nde epai Liloba ezali, Nguya na Yango Moko! Ntango moto ayambi Yango na motema na ye, Ezali na bopeto na Yango kati na Yango. Ezali na Nguya na Yango kati na Yango. Ezali mpenza na kati na Liloba Yango moko, ezali kobimisa Bomoi.

<sup>84</sup> Ntango Yisalaele bazalaki kokende mosika na Yango, bazalaki kozua kokoso. Na ntango nyonso bazalaki kokende mosika na Yango, bazalaki kozua kokoso.

Ezali pe bongo mpo na biso sikawa. Soki kolamuka ekei mosika na Yango, na ntango wana ezali na ntina te. Ezali komitimolela maziba, pe, to mabulu ya mai ya bosoto, pe esi ebandi.

<sup>85</sup> Kasi Azalaki ntango nyonso kosunga bango. Koyimayima na Mbu Motane, kuna, ntango bayimayimaki. . . Nzoka nde, na nyonso wana, Alakáká, Apesáká bango elaka. Asengelaki kozongisa bango kuna mbala moko, soki ezalaki biso; kasi Alakáká ete Akokómisa bango kuna.

Asalaki nini? Na bana na Yisalaele, Apesaki bango Likonzi na Móto pe nyonso, lokola litatoli, mosakoli na bango. Pe bakambaki bango kuna kino na mbu. Pe, kokoso ezangaka te, mpo na kotelemela Yango. Pe Falo ná mampinga na ye bakómaki wana. Pe boyebi likambo Nzambe asalaki? Afungolaki bobele libulu motane wana ya mai ya bosoto.

Mer Morte ezali eloko oyo ekufi koleka nyonso na mokili. Ekufi mpenza. Ezali na bosoto. Eloko moko te ekoki kozala na bomoi kati na yango.

Pe Afungolaki yango pe Apesaki bango bonsomi, na ngámbo mosusu. Amemaki bango kino epai basengelaki lisusu kokangama na eloko ya ndenge wana te.

<sup>86</sup> Na biliki, basosolaki ete bakokaki kotalela bibombelo te; ezalaki kokauka. Bamonaki, bazalaki kotambola longwa na libulu moko ya mai kino na mosusu. Ntango bazalaki na biliki, bazalaki kokufa na mposa ya mai ya komela. Pe bakei na ebombelo oyo, na etima; ezalaki ya kokauka. Bakei esika mosusu;

ezalaki ya kokauka. Bazalaki ata kokanisa te ete bakoki lisusu kozua mai ya komela.

Bongo, na esika oyo okoki kondima te na kati na biliki mobimba, bakuti mai wana. Ezalaki na kati ya libanga. Ezalaki na kati ya libanga. Esika oyo moto akoki kondima te ete akoki kozua mai, ezali nde kati na libanga oyo ekauki, na kati ya biliki. Kasi, bomoni, Nzambe asalaka makambo ya ndenge wana. Na esika oyo okoki kondima te, na lolenge oyo ya libanda na momesano mpenza. Esalemaka ntango nyonso bongo.

<sup>87</sup> Bakanisaka ete esengeli kosala lisanga monene ya bibongiseli, básangana bango nyonso pe bato bátonda ebele, pe bongo na bongo, pe kosala ete bato nkoto na nkoto básala elongo, pe nyonso *boye*, mpo na kozua kolamuka.

Ntango mosusu, Nzambe azuaka mwa moto oyo ayebi ata ABC te na kati mpenza ya bato oyo bayebi mokanda te, oyo bayebi malamumu te bokeseni kati na loboko ya mobali ná oyo ya mwasi, Akoki kobanda kolamuka oyo ekoningisa mokili. Asalaki yango na ntango na Yoane. Asalaki yango na ntango ya basakoli. Moko te kati na bango, na ndenge toyebi, akotaki kelasi, kasi Nzambe azalaki na makoki ya kozua bango pe kosala likambo na nzela na bango.

<sup>88</sup> Uta na Libanga yango, mai ebimaki. Ye nde azalaki Libanga yango. Pe Apesaki mitindo ete Libanga yango esengelaki kobetama. Pe Apesaki mai ebele ya peto, ya sika, ya pembe epai na baoyo nyonso bamelaki. Abikisaki baoyo nyonso bamelaki uta na Yango. Ekokani mpenza na Yoane 3:16.

*...Nzambe alingaki mokili na motindo boye ete apesi Mwana-na-likinda na ye, . . . moto na moto oyo akondimela ye akufa te, kasi azua bomoi na seko,*

<sup>89</sup> Nzambe abetaki Libanga yango, na Gologota. Etumbu na biso ekweyaki likolo na Ye, mpo ete uta na Ye, Molimo na Bomoi éyá, oyo elingaki kopesa yo na ngai Bomoi na Seko. Ekokani mpenza na Yango, kuna na biliki.

<sup>90</sup> Bazalaki na ntina soki moke te ya kobenda, kotimola, kopompé, to eloko mosusu; bobele kosangana, ofelé, na nzela oyo Abongisaki. Bongo, bazalaki na ntina ya kobimisa yango na kati na etima te. Bazalaki na ntina ya kotoka yango na katini te. Bazalaki na ntina ya kozala na singa mpo na kotoka na yango mai te. Basengelaki bobele kosangana na yango.

Yango nde nyonso oyo esengeli sikawa. Ozali na ntina ya kokóta na lisanga moko te. Ozali na ntina ya kofukama na etumbelo te mpo na komisalela eloko moko, wana ozali kopompé yango. Ozali na ntina te ya kozongela koloba liloba moko mbala na mbala na mbala, kino ete ózua mobulu na elobeli na yo. Likambo moko kaka oyo osengeli kosala, ezali bobele ete ósangana na Ye, ofelé, na nzela oyo Nzambe abongisi. Na kopompé te, na kopusa te, to na eloko mosusu te; bobele kozua

Yango ofelé. Ozali na likambo ya kosala te; bobele ósangana na Yango. Elingi koloba, ndima Yango kaka. Yango nde nyonso oyo nakoki koloba mpo na yango.

Bazalaki na ntina soki moke te ya kosala eloko moko mpo na yango. Bazalaki na ntina soki moke te ya kotimola mpo na kozua yango. Bazalaki na ntina soki moke te ya kofukama pe kolela butu mobimba, mpo na kozua yango. Basanganaki bobele na yango; esilaki kobetama pe ebelemaki. Ya solo.

<sup>91</sup> Nazali kotala mobali moko sikawa, oyo afandi kuna na suka. Namikaniseli ete nalobelaki ye yango, mokolo moko, na mwa ndako moko ya bibwele, pembeni na elielo.

Pe alobaki: “Kasi nazali na ntina te.”

<sup>92</sup> Nalobaki: “Nayebi yango.” Pe nalobaki: “Ngai pe te.” Kasi nalobaki: “Yo, ozali kotala nde oyo ozali. Tika kotala oyo ozali, kasi tala nde oyo Ye azali.”

Alobaki: “Soki nakoki bobele kotika makaya oyo, Ndeko Branham, na—na—nakokóma Moklisto.”

<sup>93</sup> Nalobaki: “Kotika yango te. Ozali koluka kokóma moto malamú, bongo óyá epai na Ye. Ye ayaki kobikisa bato malamú te; Ayaki kobikisa bato mabe, baoyo bayebi ete bazali bato mabe.”

Alobaki: “Ee. . .”

Nalobaki: “Yoka, olingi kokende na lifelo te, boye te?”

Alobaki: “Te.”

<sup>94</sup> Nalobaki: “Ee, otindami kokende kuna te. Akufaki mpo otindama kokende kuna te.”

Alobaki: “Eloko nini nasengeli kosala?”

Nalobaki: “Eloko te. Ezali kaka pete bongo.”

Alobaki: “Kasi soki mokolo moko nakoki. . .”

<sup>95</sup> Nalobaki: “Obandi lisusu, ozongeli likambo ya likaya. Tika kokanisa likaya wana. Kobosana te, kanisaka nde Ye, oyo Ye asalaki, oyo Azali; kasi oyo yo ozali te. Yo ozali na ntina te; ozalaki na yango te, pe okozala na yango te. Kasi, oyo Ye azali, Ye nde!” Pe nalobaki: “Sikawa, eloko moko kaka oyo osengeli kosala; soki Ye azuaki esika na yo kuna, yo ndima kaka oyo Ye asalaki. Eloko moko kaka oyo osengeli kosala, ezali bobele ete óndima yango.”

“Bongo,” alobaki: “ezali pete. Nakosala yango.”

<sup>96</sup> Nalobaki: “Mokele yango oyo.” Bomoni? Namemaki ye awa pe nabatisaki ye na Nkombo na Yesu Klisto.

Bandeko na ye mosusu bazali awa, pe na—nayebi ete bamonaki ngai ndenge mosusu ntango nasalaki bongo, kasi nayebaki eloko nazalaki kosala. Namonaki eloko moko ya solo

kati na mobali yango. Nazalaki komona yango wana, nayaki na ye pe nabatisaki ye na Nkombo na Nkolo Yesu.

Pe, na ntango yango, eumelaki te nsima na yango, nakendeki na ndako ya mwana na ye ya mobali. Tomonaki e—emononeli ya nzete oyo ebukanaki na esika moko boye, pe moto yango akweyaki, mokuwa na ye ya mokongo elingaki kobukana. Bamemaki ye na lopitalo. Pe na butu wana, Nkolo amonisaki ngai ete ezalaki nde suka ya makaya mpo na ye.

Bongo, mokolo oyo elandaki, azalaki na mposa ya makaya. Nalobaki: “Nakosombela ye karton pe nakomemela ye yango. Bino botala malamumu pe bokomona, ntango na ye mpo na makaya esili.” Banda wana, amelá lisusu makaya te, pe azalaka lisusu na mposa na yango te. Nzambe!

<sup>97</sup> Bomoni, likambo ya liboso oyo osengeli kosala, ezali ete óyá na Liziba yango. Osengeli koya na Mai yango, ósosola ete okoki kosala eloko moko te. Ezali nde oyo Ye asalaki mpo na yo. Ozali na ntina ya kotimola te; ozali na ntina ya kopompé te; ozali na ntina ya kotika eloko *oyo* te; ozali na ntina ya kotika eloko *oyo kuna* te. Likambo moko kaka oyo osengeli kosala, ezali ete ókende kuna pe ómela. Esili. Soki ozali na mposa ya mai; mela!

<sup>98</sup> Bongo, Azalaki Libanga. Nzambe abetaki Ye mpo na biso, pe Abimisaki mai ya kitoko pe ya peto na boike. Azali pe kosala yango, lelo, mpo na baoyo nyonso balingi kondima. Ezali ngolu na Ye, na ntembe te, mpo na bato na Ye, biso.

<sup>99</sup> Eloko moko ya ndenge wana ezali kuna, oyo ekokani na bato ya lelo, babelemi mpo na kozua oyo bakoki kozua, kasi baboyi kosunga oyo asungaki bango. Yisalaele babelemaki mpo—mpo na komela mai na libanga, kasi balingaki te kosalela Nzambe mosala na Ye oyo basengelaki kosalela Ye.

<sup>100</sup> Pe Ye, Asungaka biso ntango nyonso. Boyebi, tokoki ata kopema te soki Ye te. Tokoki kopema te, soki Nzambe asungi te. Tala ndenge tosengeli na Ye. Nzoka nde, tokómaka pene na kopasuka soki tomeki kosala, soki totindami kosala eloko moko mpo na Ye. Soki Asengi biso tósala eloko moko, tókende kotala moto, tókende kobondela mpo na moto, tókende kosunga moto, tokómaka pene na kopasuka, mpo na kosala yango. Kasi tolingaka kosala eloko moko te mpo na kosalela Ye.

<sup>101</sup> Motungisi na Ye ezalaki: “Batiki Ngai, Ngai Liloba; pe bandimi libulu oyo etobuani na esika na Ngai. Bondim-... Batiki Ngai, Ngai Liziba na Bomoi, Liziba ya Mai na Bomoi; bazali na mposa, pe basepeli komela mai ya bosoto ya libulu.” Bokoki kokanisa yango?

<sup>102</sup> Okoki sikawa komikanisela moto oyo, na ntango libulu ya solosolo ya mai ezali *awa*, ezali kobimisa mai ya kitoko, ezali na kalker, oyo ezali kouta mbala moko na kati ya mabanga, kuna na kati ya zelo, pe nyonso, ezali na malili pe kitoko na ndenge ekoki; bongo ásepela komela mai ya libulu moko ya bosoto

kuna, oyo ekombaki motondo ya ndako ya bibwele, ya bandako ya manzanza, pe bandako oyo ezali nzinga-ninga wana? Pe ekoti na libulu wana, mai oyo elembisi bosoto pe ememi yango, kouta na ndako ya kobomba biloko, ndako ya bibwele, pe ndako ya mpunda, nyonso wana ezali koya kokota na libulu, bongo tóndim- . . . tómela mai na yango na esika ya kokende na libulu ya solosolo? Bongó ya moto wana ekozala malamau te. Ya solo.

<sup>103</sup> Pe ntango mobali to mwasi azui ngámbo ya ebongiseli oyo ezali kopesa nzela ya kokata suki, kolata bakupe, kopakola-pakola, pe makambo mosusu nyonso wana, ná mwa ma—manaka moko boye, ná mobulu nyonso wana, pe akoki kokende na masano ya bowling, pe—pe bolema nyonso wana, pe bazali koyikela yango mpiko; pe bazali kolinga makambo wana mingi koleka Liloba na Nzambe ya lolenge ya kalakala, oyo ezali kokata pe kolongola, pe ezali kokómisa basi bamama ya kilo, ezali kozua bango pe kolatisa bango malamau, pe kosala ete bamikamba na ndenge ebongi, ezali kolongola makaya pe tumbako, kolápa ndai pe kotúka, kokosa pe koyiba, oyo ekolongola nyonso ya mokili, mpo na kopesa yo Eloko oyo ekosilisa yo mposa nyonso. Mpo na nini mobali to mwasi akolanda eloko ya ndenge wana mpo na koluka libondisi? Ndenge nini okoki kozua libondisi kati na yango?

<sup>104</sup> Ndenge nini okoki komela mai ya sika na libulu ya mai ya bosoto? Mpo na nini moto . . . Soki moto akei komela mai na libulu ya bosoto, na ntango oyo liziba ya mai ezali wana, okoloba: “Eloko moko ezali kotambola malamau te na bongó ya moto wana.”

Soki mwasi to mobali akei koluka libondisi na esika ya ndenge wana, eloko moko ezali kotambola malamau te, epai na moto yango, na molimo. Balingi Liloba te. Ezali kotalisa ete lolenge na bango ezali naino ya ligbololo, to ya litaká, to ya eloko mosusu, ya solo, eloko moko ya ndenge wana, oyo elingaka mai ya bosoto, mpo ete biloko ya ndenge wana ekoki te kobika kati na Mai ya sika. Ekoki te; ezali Mai ya sika. Ekoki te.

<sup>105</sup> Bongo, motungisi ezalaki: “Batikaki Yango.” Lelo pe, basali kaka bongo.

Sikawa, botala mwasi wana na liziba. Ee, ayaki na libulu ya Yakobo, pe azaláká ntango nyonso kotóka mai wana, na libulu ya Yakobo. Kasi libulu ya Yakobo, tokoki kobenga yango ebongiseli, mpo ete atimolaki mabulu misato; pe oyo wana, ye moto atimoláká yango. Bongo, mwasi yango azalaki na makambo minene. Alobaki: “Ee, tata na biso moto atimolaki liziba oyo, Yakobo. Amelaki mai na yango, bibwele na ye pe emelaki mai na yango, pe nyonso. Yango ekoki te?”

<sup>106</sup> Alobaki: “Kasi mai oyo otokaka awa, oyokaka lisusu mposa, osengeli kozonga awa mpo na kotoka yango. Kasi,” Alobaki, “Mai oyo Ngai nakopesa yo ezali Liziba, Geysers oyo ezali

kobimisa mai uta na kati, pe okoya awa mpo na kotoka Yango te. Ezali wana, elongo na yo.”

<sup>107</sup> Botala. Kasi ntango asosolaki ete Liziba ya Makomi nde esololaki na ye, na nzela na elembo ya Makomi oyo ye azalaki kozela, atikaki mimesano wana ya ebongiseli ya Yakobo, pe azongaki lisusu kuna ata mokolo moke te, mpo akutanaki na Libanga mpenza. Bomoni? Akimaki mbangu kino na engumba. Mpo na ye, likambo ya masumu esilaki. Azalaki lisusu mwasi ya bomoi ya mbindo te. Alobaki: “Boya, kotala Moto oyo nakutani na Ye, Mobali oyo ayebisi ngai makambo oyo nasalaki. Boye Ye azali Klisto mpenza te?” Mwasi yango. . . Libulu wana ekokaki na yango kozala malamumu; esalaki mosala na yango. Sikawa, azalaki liboso na Liziba oyo ya solosolo. Libulu ezalaki malamumu kino ntango Liziba mpenza efungwamaki. Kasi ntango Liziba oyo ya solosolo ekómaki wana, libulu ebungisaki makasi na yango. Mwasi yango asosolaki ete esika ya malamumu koleka ya komela mai ezalaki.

<sup>108</sup> Pe esika ya malamumu koleka ezali. Esika ya malamumu koleka ezali, ezali nde kati na Klisto. Na Yoane 7:37 pe 38, Yesu alobaki, na mokolo ya suka ya elambo na mingombo: “Soki moto azali na mposa ya mai, áyá epai na Ngai, pe amela.”

Bango nyonso bazalaki kosepela. Bazalaki na mwa esika moko oyo ezalaki kobimisa mai, uta na nse ya etumbelo, pe—pe bango nyonso bazalaki komela mai wana, na libubu, ya—ya elambo. Pe balobaki: “Bakoko na biso bamelaki mai na libanga ya molimo kati na biliki.” Bomoni, basilaki komitimolela libulu, mai ya bosoto oyo bapompaki uta na esika moko boye, pe bazalaki kobimisa yango na nse ya tempelo kuna. Pe bango nyonso bazalaki kosangana zongazonga na mai yango mpo na komela, pe koloba: “Eleki mibu ebele, bakoko na biso bamelaki mai na biliki.”

Yesu alobaki: “Nazali Libanga yango, oyo ezalaki na biliki.”

Balobaki: “Toliaki mána oyo eutaki na Likolo, oyo Nzambe akitisaki lokola mbula.”

<sup>109</sup> Alobaki: “Ngai nde Mána yango.” Ye, Liziba yango, Azalaki na kati na bango. Lipa yango ya Bomoi ezalaki na kati na bango.

Kasi balingaki Yango kaka te. Basepelaki nde kozala na libulu na bango; mpo ete moto asalaki *oyo boye*, pe Nzambe atindaki Oyo kuna. Bokeseni mpenza nde yango wana. Bamitimoleli mabulu!

<sup>110</sup> Alobaki: “Soki moto azali na mposa ya mai, aya epai na Ngai, pe amela.” Ye nde Liziba yango.

Pe ndenge Makomi elobi: “Longwa na motema na ye, bibale na Mai na bomoi ekobima.” Oh, Ye nde liziba yango! “Longwa na motema na ye, to na kati na ye mpenza, bibale na Mai na bomoi ekobima.”

<sup>111</sup> Azali Libanga oyo ezalaki kati na . . . Ezalaki Libanga ya Agar, na ntango ya mpasi; ntango mwana na ye alingaki kokufa, ntango babenganaki ye na molako, pe azalaki kuna elongo na elenge Ismael. Mai na ye, oyo ezalaki na kati ya ebombelo na ye oyo azalaki komema, esilaki. Atiaki elenge Ismael na nse; pe akendeki, mwa mosika, pe alelaki, pe, oh, mpo ete alingaki te komona mwana na ye kokufa. Pe mbala moko, Mwanje na Yawe alobi, pe amonaki Ber- . . . Bershebá, li—liziba oyo ezalaki kobimisa mai kuna, pe ezali kokoba kobimisa mai kino lelo. Ye nde azalaki Ber-Bershebá ya Agar, Libanga, kuna na biliki.

<sup>112</sup> Ezalaki awa, kati na Liziba oyo etondaki na Makila, mokolo wana, Ezalaki kuna, na tempelo. [Eteni oyo ezangi maloba na bande—N.D.E.] . . . ntango na ekúmbaki. Na Zakaria mokapo ya 13, Azalaki Liziba oyo ezalaki polele na ndako na Dawidi, mpo na kopetolama, pe mpo na (masumu) kopetolama na masumu. Azalaki Liziba yango. Pe na Nzembo 36:9, Azalaki Liziba na Bomoï mpo na Dawidi. Azali kino lelo Liziba yango na ndako ya Dawidi.

Pe Azali liziba ya moyembi, kuna na nse ya motema na ye. Moyembi alobaki:

Liziba moko ezali oyo etondi na Makila,  
Oyo euti na misisa ya Emanuele,  
Soki basumuki bamibwaki kati na yango,  
Mbindo ya mabe na bango ekolongwa.

Ye nde Liziba yango ya Bomoï, Liziba ya Mai. Azali Liloba na Nzambe.

<sup>113</sup> Bato ya ntango na suka oyo batiki Ye, Ye Liloba ya solo, Mai na Bomoï; pe bamitimoleli mabulu ya bibongiseli; pe, lisusu, bapapi, batimoli!

<sup>114</sup> Nzoka nde, tomoni ete bazalaki na mabulu oyo etobwani. Pe lisusu, libulu yango etondi na mikolóbe ya kozanga kondima, bipale ya kozanga kondima, miango ya kelasi, pe bongo na bongo, oyo ekesani na bilaka na Nzambe. Bazali baoyo batiaka ntembe na Liloba.

<sup>115</sup> Bongo, mabulu oyo bazali na yango, Biblia elobi ete ezalaki oyo “etobwani.” Libulu oyo *etobwani* ezali libulu oyo “etangaka”, pe oyo elekisaka mai. Ezali kosala nini? Ezali kotangisa mai kati na bosoto ya basambeli, oyo ebengami Lisanga ya Mangomba ya Mokili. Pe wana nde esika libulu oyo etobwani ezali komema bango, nyonso wana mpo batiki Ye, pe ba . . . Liziba ya Mai na bomoï; pe basali mabulu oyo.

<sup>116</sup> Bamitimoleli mimesano minene ya makindo ya koyekola, ya kelasi, pe nyonso. Tala lolenge ya mabulu oyo bazali kotimola lelo, elingi koloba, moto asengeli kozala na lípolóme ya filozofi, to lípolóme ya droit, to lípolóme ya lettre, to eloko moko ndenge wana, liboso kutu ábanda koteya. Mabulu oyo etondisami na malakisi ya likindo oyo esalemi na bato. Bazali kokotisa bango

na biteyelo minene ya zebe ya likolo, pe kuna bazali kokotisela bango malakisi na bango moko ya likindo oyo esalemi na bato, pe bazali kotinda bango na yango. Mokolo nini boye oyo tozali kobika kati na yango, mabulu oyo esalemi na bato! Ezali likambo ya komitungisa te ete . . . Ezali likambo ya kokamwa te ete ekómi kolumba nso—nsolo, hólalá, ezali mpo bato bazali komela mai na yango.

<sup>117</sup> Pe ntango bato bakómaka na mposa ya esengo lelo, basalaka nini? Bato, na esika ete bayamba esengo ya Nkolo, balandaka masumu, mpo bázua esengo. Bato oyo basambelaka pe balobaka ete bazali basali na Klisto, ntango bakómaka motema likolo—likolo mpenza, bapelisaka likaya. Pe ntango ba—ntango basi balingi ko—komisepelisa, balataka bilamba na bango ya nsoni pe bakei kokata pelúze na ntango mibali bazali koleka wana, mpo mibali bábenga bango na mpiololo. Bazali kosala nyonso mpo bayebana. Balingi kozala lokola ba-vedette ya sinéma. Esengo na bango yango wana.

Nzoka nde Yesu alobaki: “Ngai nde Nakoki mpo na bango.”

Ntina oyo balandaka makambo wana, ezali mpo ete balingi komela mai na Liziba yango te. Baboi Yango. Balingi komela mai na Yango te. Bazali kokota na mwa mimesano oyo bato basali, mwa mabulu oyo etondi na biloko ya bosoto ya ndenge na ndenge, epai bakoki kokende ndenge wana.

<sup>118</sup> Lobi, tomemaki bana na ebale. Nakanisi ezalaki mokolo ya póso, na ntongo. Tokendeki kuna; Billy azalaki kolóbo mbisi na buato. Pe tomemaki bana kuna, koko na ngai ya mobali ná bamosusu, mwana na ngai ya mwasi, ná mwana na ngai ya mobali, oyo ya moke, pe tokendeki na ebale ko—kotambola na buato. Okokaki ata kotambola na buato na ebale te, mpo bato ya mbindo, ya bosoto pe ya salité bazalaki kuna na ebale, pene bolumbu pe bazalaki kosala bisálasála. Buato moko elekaki pembeni na biso, ememaki bana mibali ya mibu zomi na mibale, zomi na minei, moko na moko ná linzanza ya masanga na loboko, ná likaya. Babengi yango “kosepelisa nzoto.” Hólalá! Mokili oyo ekoki lisusu kouwela ntango boni, ná mimesano ya boye?

<sup>119</sup> Na nsima, mpo na kolongola likanisi ya kokende lifelo ntango bakokufa, oyo basalaka, bakendaka kokota na moko na mabulu wana oyo bato basali. Bongo, kaka lolenge ya bato wana nde bazali kati na libulu yango. Ezali eloko mosusu te bobele etonga ya mataká ya mokili, ya mbindo, pe bosoto. Pe basanganaka na yango mpamba te, ndenge mama na ngai azaláká koloba: “Biloko oyo ekokanaka esanganaka.” Baboi koya na Liziba, mpo bapetolama na bomoi wana ya masumu. Balingi na bango kofanda kuna, kasi bazali kokoba koloba ete bazali Baklisto. Mpo na nini? Bapesi Ye mokongo, Ye Liziba ya solosolo ya esengo, ya Bomoi, ya Bomoi pe ya esengo oyo ebongi be. Yango wana basali bongo, ezali mpo balingi kokota kati na



yango. Kuna bazali na lolenge ya bato oyo bandimaka biloko ya ndenge wana.

<sup>120</sup> Eumeli te awa, ngai ná Ndeko Fred, ná Ndeko Tom, ndambo na bato kati na biso, tokendeki na ndakonzambe ya ba-Baptiste, oyo eyebani mingi kati na engumba ya Tucson, mpo na kotala soki tokokaki te komona mwa eloko oyo ntango mosusu ekokaki kopesa biso mwa makasi. Pe motei alobaki likambo moko na ntina na bato oyo bazalaki na Ezipito, ntango bakendeki bazalaki kolia áyi, ná biloko mosusu, bazalaki na mposa ya kozonga mpo na kolia yango. Alobaki: “Yango ekokani mwa moke na bato ya lelo.”

Pe, biso, biso nyonso tolobaki: “Amen!” Namóná naino bato ya ndenge wana te! Ndakonzambe mobimba babosani motei pe babaluki mpo na kotala nani yango alobaki “amen.” Ebangisaki bango mpenza. Bayebaki yango te.

Nzoka nde, Dawidi alobaki: “Boganga na kosepela liboso na Yawe. Bosanzola Ye na lindanda! Bosanzola Ye na likembe! Tika ete nyonso oyo ezali na bomoi esanzola Yawe. Pe bosanzola Yawe!” Nzambe asepelaka kati na bato na Ye. Tika ete baoyo bazali na boyebi baloba: “Amen,” ntango balobi likambo moko ya sembo.

<sup>121</sup> Mpo na nini te kopesa mokongo na momesano pe mabulu oyo ya mokili, mpo na kotala momesano ya sembo ya Nzambe, elingi koloba liziba ya solosolo, Yesu Klisto? Mpo na nini bobaloli miso epai na Ye te, na ntango oyo Nzambe azali liziba ya esengo na biso, liziba ya masanzoli na biso, liziba ya kosepela na biso? Kimia ya minsisá na ngai eutaka epai na Nzambe.

Ntango natungisamaka, nazuaka esengo na ngai kati na Klisto, na likaya te, na biloko ya mokili te, na kosangana na endimeli moko te; kasi soki ozui Ye, Liloba na elaka, oyo Alobaki: “Soki Nakei, Nakoya lisusu pe Nakoyamba bino.” Nazuaka esengo na ngai kati na yango. Ye nde Esengo na ngai.

<sup>122</sup> Bazali koloba lelo ete, na kosangana na makambo oyo pe kosala Lisanga ya Mangomba ya Mokili, nde bakosala esika ya malamumu koleka mpo na kobika kati na yango. Na bosembo ya makanisi na ngai, bakosala nde esika malamumu koleka mpo na kosala masumu kati na yango. Ezali bobele. . . Likambo yango mobimba ezali lisumu, ata boni; mpo na kobika kati na yango te, kasi mpo na kokufa kati na yango. Komisalela esika ya kosala ma—masumu kati na yango, na esika ya kobika kati na yango.

<sup>123</sup> Eloko mosusu nyonso, libanda na Yesu Klisto ná Liloba na Ye ya Bomoi, ezali libulu oyo etobwani. Nyonso oyo ekomeka kozua esika na Yango; nyonso oyo okomeka kosala mpo na kopesa yo kimia, nyonso oyo okomeka kosala mpo na kobondisa yo, esengo nyonso oyo okozua uta na eloko mosusu, mpo na kozua esika na Yango, ezali libulu etobwani oyo etondi na bosoto. Ye nde apesaka esengo oyo ebongi be.

<sup>124</sup> Nazali komikanisela awa, na eleko ya molunge, eleki mwa mibu, nabimaki na ekuke ya nsima. Mwa elenge mobali moko azalaki wana pe alobaki na ngai, alobaki: “Oyebi, ntina oyo yo olobelaka basi ntango nyonso ndenge wana, oyo balataka bakupe pe nyonso,” alobaki, “ezali mpo yo okómi mobangé.” Alobaki: “Yango nde ntina.”

Nalobaki: “Yoka. Yo ozali na mibu boni?”

Alobaki: “Ntuku mibale na nsambo.”

<sup>125</sup> Nalobaki: “Ntango nazalaki elenge koleka yo, nazalaki koteya kaka bongo.”

Nasila komona Liziba oyo esilisaka mposa. Ye nde libula na ngai. Amen! Na ntango nyonso Azali kopesa, bonzenga nde yango wana. Ezali—ezali mpo na ngai. . . Yango nde ntoki mpo na ngai, ezali ete nátalaka Ye, nátalaka ndenge loboko na Ye ezali kosala pe námonaka oyo Azali kosala. Nayebi liziba mosusu te!

Oh, ebale yango ezali kitoko  
 Oyo ezali kokómisa ngai pembe lokola  
 matandala;  
 Nayebi liziba mosusu te,  
 Eloko mosusu te bobele Makila na Yesu  
 Liziba moko ezali oyo etondi na Makila,  
 Oyo euti na misisa ya Emanuele,  
 Soki basumuki bamibwaki kati na yango,  
 Mbindo ya mabe na bango ekolongwa.

<sup>126</sup> Ya solo, nayebi liziba mosusu te, bobele Liziba oyo wana. Epetolaki ngai ntango nazalaki na bosoto. Ezali kobatela ngai peto, mpo ete nalingi mpenza kobika pembeni na Yango, komela Mai ya sika, oyo etondisaka molimo na ngai na esengo.

Nakoki kolemba makasi, pe komona lokola nakoki lisusu mpenza koyika mpiko. . . kokoba te, nakoki lisusu kokende esika mosusu te; na bongo, nakoki kofukama pe kotia mosapi na elaka moko, pe koloba: “Nkolo Nzambe, Yo nde makasi na ngai. Yo nde esengo na ngai. Yo nde nyonso na nyonso mpo na ngai.” Nakoki koyoka Eloko moko ebandi kopunja-punja kuna kati na ngai. Nazui lisusu mpiko.

<sup>127</sup> Lokola nalekisi mibu ntuku mitano, nakolamuka na ntongo, boyebi ndenge ezalaka, ekómaka mpasi mpo na kokitisa ata lokolo moko na mbeto. Oh, ekómaka mpasi mpo na kosala yango; pe moto atelemba na ekuke, azali kobeta, to Billy azali koyebisa ngai ete bosenga moko ya mbangu-mbangu ezali, na esika oyo esengeli ete nakende. Pe nakomilobela: “Nakosala yango ndenge nini?” Nakomeka kokitisa lokolo moko na nse.

Nakanisi: “Yo nde Liziba oyo etondi na makasi na ngai. Amen! Makasi na ngai pe lisungi na ngai eutaka na Yawe. Yo nde Liziba na ngai! Yo nde bolenge na ngai! ‘Baoyo batiaka mitema epai na Yawe, bakoza makasi ya sika; bakopumbwa likolo na

mapapu lokola mpongo, bakopota mbangu, nde bakolemba te; bakotambola, nde bakosenzwa te.' Nkolo Nzambe, ezali lotomo na ngai ete nákende. Babengi ngai na esika ya mosala." Pe mbala moko, Eloko moko ebandi kopunzwa kati na ngai.

<sup>128</sup> Mokolo moko, kuna na kati ya mwa esikamoko, nasalaki liyangani moko awa na Topeka, Kansas; elenge mobali moko azalaki wana, elenge motei, moko na bato ya liboso oyo bazalaki kosunga mayangani na ngai. Ndeko Roy, oyo azali awa, ayebi esika yango. Kuna, na esika oyo ya monene, ezalaki na—na . . . Motei moko akotaki na nse ya motondo to na esika mosusu, etutu moko ebukanaki, pe enyataki ye kuna na nse. Elenge mobali yango alingaki kokufa. Libale na ye epasukaki. Rate na ye elongwaki na esika na yango. Bozito ya ba-tone ebele ekweyaki likolo na ye.

<sup>129</sup> Na ntongo, ntango nazalaki kolia, nafandaki pe nazalaki kosolola na mwasi na ngai. Nalobaki: "Mwasi na ngai, oyebi, soki Yesu azalaki awa, oyebi eloko Alingaki kosala?" Nalobaki: "Ntango azalaki kosunga na ngai: 'Nandimi Liloba oyo,' azalaki kosunga nde na Klisto." Pe nalobaki: "Oyo wana ezali mayele mabe ya zabolo." Nalobaki: "Soki Yesu azalaki awa, Alingaki kokende kotiela ye maboko na Ye ya bulee. Elenge mobali yango alingaki kobika. Ata ndenge libale na ye epasuki. Alingaki kobika, mpo ete Yesu alingaki kokende kuna, wana Amiyebi malamuni Nani Ye azali. Ayebaki kolangama na Ye, Makomi ezalaki na elonga, ezalaki kotatola kati na Ye ete Ayebaki Nani Ye azalaki, kozanga . . . na ntembe ata moke te. Alingaki kotiela ye maboko na Ye, pe koloba: 'Mwana, bika,' pe Akei na Ye." Pe nalobaki: "Na ntango wana, milimo mabe nyonso ya lifelo balingaki kokoka te koboma elenge mobali yango." Nalobaki: "Alingaki kobika." Kasi nalobaki: "Omoni, molingami, Ye azalaki Yesu, maboko ya bulee ya Nzambe."

Nalobaki: "Ngai nazali mosumuki. Nabotámá na mwasi na mobali. Tata na ngai pe mama na ngai, bango mibale bazalaki basumuki, pe nazali mpenza moto azángá ntina."

Pe nalobaki: "Kasi oyebi? Soki Nkolo apesaki ngai emononeli pe Atindaki ngai kuna, na ntango wana, elingaki kozala ndenge mosusu." Nalobaki: "Nalingaki kokende kuna pe kotiela ye maboko, alingaki kotelema na mbeto wana, soki Apesaki ngai emononeli."

<sup>130</sup> Bongo nabandaki kokanisa: "Nsima na nyonso, soki emononeli ezalaki, eloko nini elingaki kosalema? Elingaki kozala kaka maboko yango ya bosoto likolo na ye, iyo, kaka moto yango moko kobondela mpo na ye, kaka maboko yango ya bosoto."

Bongo nabandaki kokanisa: "Nazali ntoma na Ye. Boye, Nzambe amonaka ngai te. Makila ya Moyengebeni wana ezali kuna likolo na etumbelo; ezali kolobela ngai. Ye nde akoki mpo na ngai. Ye nde libondeli na ngai. Ye nde Bomoï na ngai."

Nalobaki: “Eloko moko kaka oyo ekosala ete natia maboko na ngai likolo na ye, na kondima, ezali mpo ete nandimi emononeli. Pe soki emononeli ezali te, kaka kondima yango ekosala mosala yango; bongo nakoki komitala ete nazali na ntina te, kasi kotala ete Ye nde Azali nyonso kati na nyonso mpo na ngai. Azali Bomoi na ngai. Ye moto Atindi ngai. Ebongiseli moko te etindi ngai; Ye moto atindi ngai. Aleluya! Nakei na Nkombo na Ye. Nakotiela ye maboko.” Nakendeki kuna kotiela elenge mobali yango maboko, pe na mpokwa wana azalaki kati na liyangani, na nzoto kolongonu mpenza. Amen!

<sup>131</sup> Oh, iyo, Azali Liziba yango. “Nayebi liziba mosusu te. Eloko mosusu te bobele Makila na Yesu!” Ngai nazali na ntina te, nazali moto mpamba, biso nyonso, kasi na miso na Nzambe tobongi be. Ye- . . . “Bongo bobonga be, lokola Tata na bino na Likolo abongi be.” Ndenge nini bokoki kokóma bongo? Mpo ete Moto oyo abongi be azali kotalisa biso kuna. Liziba yango ezali wana mikolo nyonso, ya sika. Ezali eloko ya bosoto te, kasi ya sika mikolo nyonso, oyo elongolaka masumu na ngai nyonso. Azali Liziba yango.

<sup>132</sup> Sikawa, mpo na kosukisa, nakoki koloba boye. Biloko nyonso oyo ekesani na Oyo ezali mabulu etobwani, oyo ekosuka na kotangisa eloko oyo okotia kati na yango; soki otii elikia na yo nyonso, ntango na yo nyonso, pe nyonso, kati na moko na mabulu oyo etobwani. Yesu alobaki ete ezali mabulu oyo etobwani. Nzambe alobaki: “Etobwani, pe ekolekisa nyonso oyo okotia kati na yango.” Okokende na yango mosika te, mpo ete ekotanga. Mpamba te, Ye nde nzela bobele moko ekomema na Solo, na Bomoi, pe na esengo ya Seko, pe na kimia ya Seko. Kaka Ye pe Azali nzela bobele moko mpo na kokóma na Yango. Hólalá!

<sup>133</sup> Liziba ya Bomoi oyo akaukaka te ezali nde Yesu Klisto. Mpo na nini? Pe Azali Nani? Liloba, ndenge moko; Liloba, Bomoi, Liziba, “ndenge moko lobi, lelo, pe libela.” Mpo na mondimi ya solo, Yango nde esengo na ye oyo eleki monene, Bomoi na ye oyo eleki monene. Pe kosepela na ye oyo eleki monene ezali kati na Klisto. Ezali na bosenga ya kopompé te, kobenda te, kokota te, kosilisa yango te; bobele kondima pe kopema. Yango nde oyo Ye azali mpo na mondimi.

<sup>134</sup> Lokola tata Abalayama; azalaki kobenda te, komilela te, komitungisa te. Azalaki na Liloba. Alalaki na ntolo ya El-Schaddai. Ntango Abalayama akómaki na mibu mokama, Nzambe abimelaki ye, pe alobaki: “Nazali Oyo na Nguya nyonso.” Na ki-Ebele ezali *El-Shaddai*, elingi koloba “Ye oyo Azali na mabele.” “Okómi mobangé, pe makasi na yo esili, kasi lala bobele na ntolo na Ngai pe melá mpo ozua makasi uta na Liziba oyo.” Amen! Azuaki nini ntango amelaki? Nzoto ya sika. Abotaki mwana, na nzela na Sala. Pe, nsima na mibu ntuku mitano, abotaki bana nsambo na mwasi mosusu.

<sup>135</sup> Oh, El-Schaddai! Kondimana na Kala ezali kolakisa makambo oyo Asalaki, Kondimana na Sika ezali koloba makambo oyo Akosala. Amen! Na Kondimana na Kala . . .

<sup>136</sup> Sikawa, mopepe ya malili esili, boye nakosala noki-noki mpo nasilisa sikawa, na mwa ntango moke.

Nalingi koloba boye liboso ete nasukisa. Kala, nazuaki ndakisa malamau ya likambo oyo. Nazalaki kosenzela. Pe bato mingi awa . . . Pene na Georgetown, kuna na Milltown, kalakala, mosika kati na bangomba, motó moko ya mai ezalaki kuna. Ezalaki liziba ya solosolo. Ezalaki kobwaka mai likolo na mosanda ya pied mi—minei to mitano [1,20 to 1,50m—N.D.T.], oyo ezalaki kobima ntango nyonso, pe motó moko ya mai ya monene ezalaki pembeni wana. Pe nzinga-nzinga na yango, banzete ya mike-mike ezalaki wana, boyebi, ná biloko mosusu ya ndenge na ndenge ezalaki kokola wana, lokola matiti ya menthe. Pe, oh, ndenge nazalaki mpenza na mposa ya kokóma kuna, hólalá, ya kokóma na motó ya mai yango. Pe nazalaki komilalisa pembeni na yango, pe komela mai, kaka komela mai, nazalaki kofanda pe komela mai, kozela.

Mbula na mbula, nazalaki kaka kozonga na liziba yango moko. Ezalaki kokauka te, na eleko ya malili to ya molunge. Ekokaki kokómisa mai na yango glas te. Mai ya liziba ekómaka glas te. Oh, te! Oh, te! Ata soki ma—malili yango ekómi ndenge nini, ekokómisa yango glas te. Mai ya libulu ekómaka glas; mwa malili moke ekoki kosala yango. Bomoni?

Kasi eloko nyonso oyo eninganaka, oyo ezali na Bomoi kati na yango, etambolaka. Okoki kokómisa mai ya Liziba glas te. Ata soki molimo oyo ezali na esika yango ekiti ndenge nini, Liziba oyo ezali kaka na bomoi. Bikana pene na Liziba oyo.

<sup>137</sup> Pe namonaki kuna, nazalaki koleka pembeni wana pe nazalaki komela mai na yango, pe, hólalá, mai ya sika mpenza! Ozalaki na ntina ya komitungisa te: “Nazali komituna, soki nakómi kuna, nazali komituna soki etiki kobimisa mai?” Ebimisaka mai . . .

<sup>138</sup> Mobangé mosali bilanga moko ayebisaki ngai, alobaki: “Koko na ngai azalaki komela mai na yango.” Nalobaki: “Ebungisa makasi na yango ata moke te, to eloko moko te. Ezali kaka ndenge wana, ezali kokoba kobwaka mai pe ezali kotiola kino na ebale ya Bleu.”

<sup>139</sup> Nakanisaki: “Hólalá, oyo nde esika kitoko mpo na komela!” Nazalaki kotambola ntaka soki ya mile mobimba [1,60 km—N.D.T.], mpo na kokóma na esika yango, mpo ezalaki esika kitoko ya komela mai. Oh, mai yango ezalaki kitoko mpenza! Hólalá!

Na—nakómá sikawa kuna na biliki, na Arizona, kasi nakanisaka yango kaka: “Liziba kitoko oyo kuna, soki nakokaki bobele komilalisa pembeni na yango!”

Ndenge Dawidi alobaki mokolo moko: “Oh, soki nakokaki lisusu komela mai ya liziba wana!” Soki akokaki bobele kokóma kuna!

<sup>140</sup> Mokolo moko, nafandaki, mwa likambo moko ya ndenge mosusu ekómelaki ngai. Pe nalobaki: “Eloko nini epesaka yo esengo ntango nyonso boye? Nakosepela ete názala na esengo bongo. Kasi, naino namona yo na mawa te, uta nabandá koya awa. Eloko ata moko te ya mawa ezali kati na yo.” Nalobaki: “Otondaka na esengo ntango nyonso. Opumbwaka, otokaka pe koningana mpenza. Na eleko ya malili to ya molunge, mpio to moi, ata nini, otondaka ntango nyonso na esengo. Eloko nini epesaka yo . . . ? Nini, likambo nini? Mpo ete namelaka mai na yo?”

“Te.”

Nalobi: “Ee, ntango mosusu ba-lapin bamelaka mai na yo, pe osepelaka na yango mingi.”

“Te.”

Nalobaki: “Ee, eloko nini etokisaka yo boye? Eloko nini epesaka yo esengo? Eloko nini etondisaka yo na esengo ntango nyonso?” Nalobaki: “Ezali nde mpo ete—ete bandeke bamelaka mai na yo?”

“Te.”

“Mpo ete ngai namelaka mai na yo?”

“Te.”

Nalobaki: “Ee, eloko nini etondisaka yo na esengo boye?”

<sup>141</sup> Pe soki liziba yango ekokaki koyanola ngai, elingaki koloba boye. “Ndeko Branham, ezali te mpo omelaka mai na ngai; nasepelaka na yango, pe mpo ete nakoki kopesa mai na bandeke. Napesaka mai na moto nyonso oyo alingi komela. Eloko moko kaka oyo osengeli kosala ezali ete óyá pe ómela. Kasi, eloko oyo epesaka ngai esengo, ngai moto natokaka te, ezali eloko moko kati na ngai, nde epusaka ngai. Eloko moko nde etokisaka ngai.”

<sup>142</sup> Ezali pe bongo mpo na bomoi oyo etondi na Molimo. Ndenge Yesu alobaki, ete Azalaki na . . . Bomoni, Apesi bino maziba ya mai oyo ezali kobimisa mai kino na Bomoi ya seko, liziba, oyo ezali kobwaka mai pe kosopana, oyo ezali kotiola ntango nyonso. Ata soki bato mosusu ya lingomba basali malamumu to mabe, yo ozali kaka na Liziba yango.

Mpo na nini osepeli kozua momesano pe libulu ya kala ya ebongiseli, oyo etondi na ba-parazíte pe nyonso mosusu, mpo na komela mai oyo ezali na biloko ya bosoto, na ntango oyo obiangami na Liziba, Liziba oyo ya solosolo?

<sup>143</sup> Nakanisi lisusu ndenge ezalaki kopusa, kobaluka, pe—pe kotoka, koseka, kosepela, kopumbwa, pe kobaluka na esengo. Na eleko ya mpio, ya mbula; ya molunge, ya elanga, na ntango oyo

mboka mobimba ezalaki kokauka, yango ezalaki kaka kotoka ndenge emesáná. Mpo ete ezalaki mozindo, misisa na yango ezalaki kuna na nse ya mabanga, ezalaki kouta nde kuna.

<sup>144</sup> Oh, tika ngai nabika pembeni na Liziba oyo ezali kobwaka mai! Bózua na bino mimesano nyonso oyo bolingi, oyo bato basali, maziba na bino nyonso ya mai ya bosoto, kasi botika ngai náyá na . . . to mabulu ya mai ya bosoto. Kasi, botika ngai náyá na Liziba oyo, botika ngai náyá wana, na esika Atondi kotonda. Azali Esengo na ngai. Azali Pole na ngai. Azali ma—Azali Makasi na ngai. Azali Mai na ngai. Azali Bomoï na ngai. Azali Mobikisi ya nzoto na ngai. Azali Mobikisi ya molimo na ngai. Azali Mokonzi na ngai. Nyonso oyo nazali na yango bosenga ezali kati na Ye. Mpo na nini náluka kokende na eloko mosusu?

<sup>145</sup> Ndeko mobali, ndeko mwasi, olingi koya na Liziba oyo, na mpokwa ya lelo te? Olingi te, soki naino okómá wana te, olingi te koyamba Yango na mpokwa oyo, wana togumbi motó?

<sup>146</sup> Mabulu oyo etobwani, ezali kolekisa mai, ezali kotanga, mokili ezali kokota kati na yango, bosoto ya ndako ya bibwele pe ya bileko ya kala. Mpo na nini te Liziba oyo, oyo kati na yango biloko ya ndenge wana ekoki kofanda te, Liziba monene oyo etondi na Makila, oyo euti na misisa ya Emanuele? Mpo na nini te koyamba yango na mpokwa oyo? Tika ete Nzambe ázunga biso na mpokwa oyo, na biliki oyo ezali na mposa ya mai. Ndenge mosakoli alobaki: “Azali Libanga kati na mabele oyo ezali na mposa ya mai.” Azali Liziba yango. Olingi te koya epai na Ye na mpokwa oyo, na motema na yo, wana tozali kobondela?

<sup>147</sup> Molingami Tata na Likolo, Liziba mosusu ezali te, ndenge miziki ezali kobeta: “Nayebi liziba mosusu te; eloko mosusu te bobele Makila na Yesu.” Nabótámá kuna, nakólá kuna; nalingi kobika kuna, kokufa kuna, pe kosekwa kuna, Liboso na Ye. Ntango nyonso, Nkolo, tika ete nazala Liboso na Ye, mpamba te nayebi liziba mosusu te. Endimeli moko te, bolingo moko te; bolingo mosusu te bobele Klisto, endimeli mosusu te bobele Klisto, buku mosusu te bobele Biblia, eloko mosusu te, esengo mosusu te libanda na Ye. Soki babotoli ngai Ye, E Nzambe, ata soki nazali na biloko boni na mokili oyo, e—ekozala kaka liwa, nakotelengana maboko na motó. Soki babotoli ngai Ye, nabebi na ngai, Nkolo. Kasi soki Afandi kati na ngai, na ntango wana sanza ya zomi na mibale ekozala malamú lokola sanza ya mitano, na ntango wana bisika ya molunge ezali te pe bisika bikauki ezali te, ata liwa yango moko ezali na elonga te. Tika ete tózala na Ye, Tata. Pesa Ye, na boike, epai na bandimi nyonso oyo bazali awa na mpokwa oyo, mpo bazali kati na ndako oyo.

<sup>148</sup> Mingi kati na bango basengeli kotambola na motuka na mpokwa oyo, mpo na kozonga na bandako na bango; pe tika ete likambo oyo ézala na makanisi na bango: “Nazali kobika pene

na Liziba yango. Nazali kobika wana, nazali komela mai ya sika, ngonga na ngonga.”

<sup>149</sup> Pe soki naino bazui yango te, tika ete bayamba Ye sikawa, mpo bakoka kozonga elongo na Liziba. “Nakokende elongo na bino; Nakozala elongo na bino kino na suka na mokili.” Kokisa makambo oyo, Tata.

<sup>150</sup> Pe sikawa, wana togumbi motó, moto akoki kozala awa, na mpokwa oyo, to bato boni balingi koloba: “Nkolo, memá ngai na Liziba yango kaka sikawa. Nayaki awa bobele mpo na koyoka te; nayaki awa nde mpo na komona Eloko moko. Nayaki awa mpo na komona Yo, Nkolo. Nazali na bosenga na Yo na mpokwa oyo. Yaka na motema na ngai sikawa. Okosala yango, Nkolo?” Nzambe apambola bino. Nkolo apambola moko na moko na bino.

<sup>151</sup> Tata, Omoni maboko, ata baoyo batelemi ná baoyo bazali pene na bitutu, pe na biteni mosusu ya ndako, libanda. O—Omoni bango, Tata. Na—nasengi ete Ópesa bango nyonso oyo basengeli na yango. Ntango mosusu bazalaki komela mai ya libulu moko ya kala, Nkolo, basukaki na nzela, na esika oyo moto moko atimolaki libulu, esili kobebisama na malakisi mabe ya ndenge na ndenge, oyo ezali koboya Liloba. Nabondeli, e Nzambe, ete na mpokwa oyo báyá epai na Ye Oyo azali Liziba yango, Liziba yango ya Bomoi. Kokisa yango, Tata. Napesi bango na maboko na Yo sikawa na Nkombo na Yesu.

<sup>152</sup> Pe Oyebisaki ngai: “Soki osengi eloko moko na Nkombo na Ngai, ekosalema.” Nzoka nde, nalingaki kosenga yango te, Nkolo, soki nakanisaki te ete ekosalema. Na—nalingaki koloba yango bobele lokola na momesano. Kasi nabondeli mpo na bango, na bosembo. Nabondeli mpo na bango, pe nandimi ete Okokisa oyo Olakaki.

<sup>153</sup> Pe sikawa, nalongoli bango na libulu yango na mpokwa oyo. Nalongoli bango na esika oyo bazalaki komela mai, epai wapi mposa na bango ezali kosila te; pe namemi bango na Liziba oyo. Nasali yango na Nkombo na Yesu Klisto.

<sup>154</sup> Bakómi ya Yo, Nkolo. Tika ete bámela mai na Yo, Mai na bomoi, Liziba ya Mai na bomoi. Na Nkombo na Yesu, nasengi bongo. Amen. Kokisa yango, Nkolo.

Oh, ebaleyango ezali kitoko  
 Oyo ezali kokómisa ngai pembe lokola  
 matandala;  
 Nayebi liziba mosusu te,  
 Eloko mosusu te bobele Makila na Yesu.  
 Eloko nini ekoki kolongola masumu na ngai?  
 Eloko mosusu te bobele Makila na Yesu;  
 Eloko nini ekoki kozongisa nzoto na ngai?  
 Eloko mosusu te bobele Makila na Yesu.



E Yesu, bikisa bango, Nkolo! Kokisa yango, Nkolo, na Nkombo na Yesu. Nabondeli, e Nzambe, ete Ó...?...Yo oyebi makambo nyonso.

Nayebi liziba mosusu te,  
Oh, eloko mosusu te bobele Makila na . . .

<sup>155</sup> Bokanisa naino, nayebi liziba mosusu te! Nayebi eloko mosusu te bobele Ye. Nazali na mposa ya koyeba eloko mosusu te bobele Ye. Eloko mosusu te bobele Makila na Yesu! Oh!

Oh, ebaleyango ezali kitoko  
Oyo ezali kokómisa ngai pembe lokola  
matandala;  
Nayebi liziba mosusu te,  
Oh, eloko mosusu te bobele Makila na Yesu.

<sup>156</sup> Wana tozali koyemba yango lisusu, topesana mbote ya loboko. Bolingani? Moto moko akoki kozala awa oyo azali na likambo na moninga? Soki azali, ákende kobongisa yango. Bokosala yango? Tóbima awa ndenge wana te. Bomoni? Soki ozali na likambo na moto, kende kobongisa yango, kaka sikawa. Sikawa nde ozui libaku ya kokende koloba: “Ndeko mobali, ndeko mwasi, nalobaki mabe na ntina na yo, nakanisaki mabe. Ezalaki mposa na ngai te. Limbisa ngai.” Bomoni, basalaka nde bongo. Tóbatela Liziba katikati na biso, ntango nyonso. Bomoni?

Nayebi liziba mosusu te,  
Eloko mosusu te bobele Makila na Yesu.

Oh, ebale yango ezali kitoko  
Oyo ezali kokómisa ngai pembe lokola  
matandala;  
Oh, nayebi liziba mosusu te,  
Eloko mosusu te bobele Makila na Yesu.

<sup>157</sup> Oh, Azali malamumu, boye te? Liziba mosusu te! Tokomipesa na eloko mosusu te. Tokabwáná, totiká mokili na nsima. Tozali lisusu na mposa ya áyi ná mabulu oyo etobwani ya Ezipito te. Tozali kati na mobembo elongo na Nkolo Yesu, Libanga oyo ebetamaki, amen, tozali kolia Mana kouta na Likolo, pe komela; tozali kolia Bilei ya banje, pe komela mai kouta na Libanga. Amen!

Nayebi liziba mosusu te,  
Eloko mosusu te bobele Makila na Yesu.

Sikawa togumba motó.

<sup>158</sup> Nazali kobondela ete Nzambe ápambola bino mingi, moko na moko kati na bino, ete ngolu pe mawa na Ye ézala na bino kati na póso oyo mobimba. Pe soki likambo moko esalemi, ete moko na bino aleki na nsima na ezipelo, bobosana te ete ezali bobele mwa bangonga ya mpongi pe ya kopema liboso ete tómonana lisusu. Bobosana te ete: “Baoyo bazali naino na bomoi, bakosala libaku na baoyo balali te, mpamba te Kelelo

na Nzambe, Kelelo oyo ya suka . . .” Oyo ya motoba euti koyula. Pe Kelelo oyo ya suka, lokola Elembo na suka, ekozala Boyei na Nkolo. “Ekoyula, pe bakufi kati na Klisto bakosekwa liboso.” Bazali bobele kopema kino na ntango yango.

<sup>159</sup> Pe soki basali yo mabe, mikanisela:

Mema Nkombo na Yesu,  
Lokola nguba liboso na motambo nyonso;  
Pe wana masenginia mazingi yo,  
Loba kaka Nkombo mosantu wana na  
libondeli. (Milimo mabe ekokima.)

<sup>160</sup> Bobosana te, tozali kolikia ete tokomona bino lisusu awa, lomingo ekoya na ntongo. Bómema babeli pe bato na mawa. Nakobondela mpo na bino. Bino bóbondela mpo na ngai. Bokosala yango? Boloba: “Amen.” [Losambo balobi: “Amen.”—N.D.E.] Nakobondela mpo na bino, ete Nzambe ápambola bino.

. . .Nkombo yango kati na libondeli.

Nkombo kitoko, Nkombo kitoko, O ya boboto!  
Elikia ya mokili pe esengo ya Lola;  
Nkombo kitoko, O ya boboto!  
Elikia ya mokili pe esengo ya Lola;

Tokogumbamela Nkombo na Yesu,  
Tokofukama na makolo na Ye,  
Na Lola, tokolatisa Ye motole ya Mokonzi na  
bakonzi,  
Ntango mobembo na biso ekosila.

Nkombo kitoko, Nkombo kitoko, (ezali kitoko  
pe na boboto, boye te?)  
Elikia ya mokili pe esengo ya Lola;  
Nkombo kitoko, Nkombo kitoko, O ya boboto!  
Elikia ya mokili pe esengo ya Lola.

<sup>161</sup> Ezalaka ntango nyonso mpasi mingi mpo na kokabwana na bino. Atako nayebi ete bozali kozika na molunge, kasi eloko moko mpenza ezali. . .Tika, tozua eteni moko lisusu ya loyembo moko, bokosala yango? [Losambo balobi: “Amen.”—N.D.E.] Bokosala yango? *Épambolama, Ekanganelo Oyo Esangisi*, ndeko mwasi. Bato boni bayebi nzembo yango ya kala? Tozaláká koyemba yango, eleki mibu ebele awa.

<sup>162</sup> Pe nazalaki kokanisa, na mpokwa ya lelo, “maboko mibale, kati na nkama na nkama, nde etikali,” ntango tozalaki koyemba nzembo yango, na losambo, wana tosimbani na maboko. *Épambolama, Ekanganelo Oyo Esangisi*. Nakundi bango mingi, kaka awa na malita. Bazali kozela. Nakomona bango lisusu. Namonaka bango, yoko mbala, kati na bimononeli, ntango natalaka na ngámbo ya ezipelo. Bazali kuna.

Togumba motó sikawa, wana tozali koyemba.

Epambolama, ekanganelo oyo esangisi  
Mitema na biso kati na bolingo ya Baklisto;  
Bondeko . . .  
Ezali lokola oyo ya Likolo.

Ntango biso . . .

Sikawa sembola loboko pe simba loboko ya moninga.

. . . na ntango moke,

Sikawa bogumba mitó.

Esalaka biso mpasi na motema;  
Kasi tokotikala elongo na mitema,  
Na elikia ete tokokutana lisusu.

<sup>163</sup> Wana togumbi mitó. Nazongisi liyangani epai na mokengeli sikawa, pe asukisa na . . .



*MABULU MATOBWANI* LIN64-0726E  
(Broken Cisterns)

Liteya oyo ya Ndeko William Marrion Branham, eteyamaki liboso na Ngelesa mokolo ya lomingo na mpokwa, mokolo ya 26, sanza ya nsambo, na mobu 1964, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2012 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)